




je nous aime et ne peast nones





Paris chez Charles de Sercy au Palais dans la galerie dauphine a la Bonne Fou



ANDROMEDE TRAGEDIE

Representée auec les Machines sur le Theatre Royal de Bourbon.




A ROVEN,

Chez LAVIRENS MAVRRY, prés le Palais.

AVEC PRIVILEGE DV ROY.

M. D.C. LI.

Et se roendent APARIS, Chez CHARLES DE SERCY, au Palais, dans la Salle Dauphine, à la bonne Foy Couronnée.





A

M. M. M. M.



ADAME,

C'est vous rendre vn hommage bien secret, que de vous le rendre ainsi, & ie

m'asseure que vous aurez de la peine vous mesme à recognoistre que c'est vous à qui ie dedie cet Ouurage. Ces quatre lettres Hieroglifiques vous embarasseront aussi-bien que les autres, & vous ne vous apperceurez

EPISTRE

iamais qu'elles parlent de vous iusqu'à ce que ie vous les explique. Alors vous m'auouerez sans doute que ie suis fort exact à ma parole, & fort punctuel à l'execution de vos commandemens. Vous l'auez voulu, & i'obeys, ie vous l'ay promis, & ie m'acquite. C'est peut-estre vous en dire trop pour vn homme qui se veut cacher quelque temps à vous-mesme, & pour peu que vous faciez de reflexion sur mes dernieres visites, vous deuinerez à demy que c'est à vous que ce compliment s'adresse. N'acheuez pas ie vous prie, & laissez-moy la ioye de vous surprendre par la confidence que ie vous en doibs. Ie vous en conjure par tout le merite de mon obeyssance, & ne vous dy point en quoy les belles qualitez d'Andromede approchent de vos perfections, ny quel rapport ses aduantures ont auec les vostres; ce seroit vous faire vn miroir, où vous vous verriez trop aisément, & vous ne pourriez plus rien ignorer de ce que i'ay à vous dire. Preparez-vous seulement à la receuoir, non

EPISTRE

pas tant comme vn des plus beaux spectacles que la France ait veus, que comme vne marque respectueuse de l'attachement inuiolable à vostre seruice, dont fait vœu,

Strepton of the gallengers and the second

E A SECTION OF THE SE

MADAME,

Vostre tres-humble, tres-obei ant, & tres-obligé serviteur, CORNEILLE.

ી. આ પ્રાથમિક સુધ ભૂતિ ભૂત ભૂત મુખ્યામ સુધ, ભુગ, ભુતિ ભૂત ભૂત મુખ્યામ ભૂત મુખ્યામ ભૂત મુખ્યામ ભૂત ભૂતિ ભૂતિ મુખ

ARGVMENT.

Tiré du quatrieme & cinquieme Liure des Metamorphofes d'Ouide.

Asstor E femme de Cephée Roy d'Ethiopie sut si vaine de sa beauté, qu'elle csa la préserer à celle des Nereides, dont ces Nymphes irritées firent sortir de la Mer vn Monstre, qui sit de si estranges rauages sur les terres de l'obeissance du Roy son mary, que les forces humaines ne pouvant donner aucun remede à des miseres si grandes, on recourut à l'Oracle de Iuppiter Ammon. La response qu'en receurent ces malheureux Princes fut vn commandement d'exposer à ce Monstre Andromede leur fille vnique, pour en estre deuorée. Il fallut executer ce triste Arrest, & cette illustre victime fut attachée à vn rocher, où elle n'attendoit que la mort, lors que Persée fils de Iuppiter & de Danaë passant par hazard, jetta les yeux sur elle. Il reuenoit de la conqueste glorieuse de la teste de Meduse qu'il portoit sous son bouclier, & voloit au milieu de l'air, au moyen des aisses qu'il auoit attachées aux deux pieds, de la saçon qu'on nous peint Mercure. Ce fut d'elle-mesme qu'il apprit la cause de sa disgrace, & l'amour que ses premiers regards luy donnerent, luy fit en mesme temps former le dessein de combatre ce Monstre, pour conserver des jours qui luy estoient deuenus si precieux. Auant que d'entrer au combat il eut loisir de tirer parole de ses parents que les fruits en seroient pour luy & receut les effets de cette promesse, si tost qu'il euft tué le Monftre. Le Roy & la Reyne donnerent auec grande joye leur fille à son liberateur, mais la magnificence des nopces fut troublée par la violence que voulut faire Phinée frere du Roy & oncle de la Princesse, à qui elle avoit esté promise avant son malheur. Il se ietta dans le Palais Royal avec vne troupe de gens armez; & Persée s'en defendit quelque temps sans autre secours que celuy de sa valeur & de quelques amis genereux: mais se voyant prés de succomber sous le nombre, il se seruit enfin de cette teste de Meduse, qu'il tira de sous son bouclier, & l'exposant aux yeux de Phinée & des assassants qui le suivoient, cette fatale veuë les convertit en autant de statuës de pierre, qui seruirent d'ornement au mesme Palais qu'ils vouloient teindre du sang de ce Heros. Voilà comme Ouide raconte cette Fable, où i'ay changé beaucop de choses rant par la liberté de l'Art, que par la necessité des ordres du Theatre, & pour luy donner plus d'agréement.

En premier lieu i'ay creu plus à propos de faire Cassiope vaine de la beauté de sa sille, que de la sienne propre, d'autant qu'il est fort extraordinaire qu'vne semme dont la sille est en âge d'estre mariée, ait encore d'assez beaux restes pour s'en vanter si hautement, & qu'il n'est pas vray-semblable que cet orgueil de Cassiope pour elle-messme eust attendu si tard à esclater, veu que c'est dans la jeunesse que la beauté estant plus parsaite & le jugement moins formé, donnent plus de lieu à des vanitez de cette nature, & non pas alors que cette messme beauté commence d'estre sur le retour, & que l'âge a meury l'esprit de la personne

qui s'en seroit enorgueillie en vn autre temps.

En suite l'ay supposé que l'Oracle d'Ammon n'auoit pas condamné precisément Andromede à estre deuorée par le Monstre, mais qu'il auoit ordonné seulement qu'on luy exposast tous les mois vne sille, qu'on tirast au sort pour voir celle qui luy deuoit estre liurée, & que cet ordre ayant desia esté executé cinq sois, on estoit au sour qu'il le falloit suiure pour la sixiesme.

l'ay introduit Persée comme vn Cheualier errant qui s'est arresté depuis vn mois dans la

ARGVMENT.

Cour de Cephée, & non pas comme se rencontrant par hazard dans le temps qu'Andromede est attachée au rocher. Ie luy ay donné de l'amour pour elle, qu'il n'ose descountir, parce qu'il la voit promise à Phinée; mais qu'il nourrit toutes ois d'vn peu d'espoir, parce qu'il
voit son mariage differé iusques à la fin des malheurs publics. Ie l'ay fait plus genereux
qu'il n'est dans Ouide, où il n'entreprend la deliurance de cette Princesse, qu'apres que ses
parens l'ont asseuré qu'elle l'espouseroit, si-tost qu'il l'auroit deliurée. L'ay changé aussi la
qualité de Phinée, que l'ay fait seulement nepueu du Roy dont Ouide le nomme frere : le
mariage de deux cousins me semblant plus supportable dans nos saçons de viure, que celuy de l'oncle & de la niepce, qui eust pû sembler vn peu plus estrange à mes auditeurs.

Les Peintres qui cherchent à faire paroistre leur Art dans les nuditez, ne manquent iamais à nous representer Andromede nue au pied du rocher où elle est attachée, quoy qu'Ouide n'en parle point. Ils me pardonneront si ie ne les ay pas suivis en cette invention, comme i'ay fait en celle du cheval Pegase, sur lequel ils montent Persée pour combatre le Monstre, quoy qu'Ouide ne luy donne que des aisses aux talons. Ce changement donne lieu de vne machine toute extraordinaire & merueilleuse, & empesche que Persée ne soit pris pour Mercure: outre qu'ils ne le mettent pas en cet équippage sans sondement, veu que le mesme Ouide raconte, que si-tost que Persée eust coupé la monstrucuse teste de Meduse, Pegase tout aissé sortie de cette Gorgone, & que Persée s'en pût saisir dessor pour saire ses courses par le milieu de l'air.

Nos Globes celestes où l'on marque pour constellations Cephée, Cassiope, Persée & Andromede, m'ont donné iour à les faire enleuer tous quatre au Ciel sur la fin de la piece pour y faire les nopces de ces Amants, comme si la Terre n'en estoit pas digne.

Au reste, comme Ouide ne nomme point la ville où il fait arriuer cette Auanture, ie ne sone suis non-plus enhardy à la nommer. Il dit pour toute chose que Cephée regnoit en Ethiopie, sans designer sous quel climat. La Topographie moderne de ces contrées-là n'est pas fort connuë, & celle du temps de Cephée encor moins. Ie me contenteray donc de vous dire qu'il falloit que Cephée regnast en quelque pays maritime, que sa ville capitale sus sur les bord de la mer, & que ses peuples sustent blancs quoy qu'Ethiopiens. Ce n'est pas que les Mores les plus noirs n'ayent leurs beautez à leur mode, mais il n'est pas vray-semblable que Persée qui estoit Grec & né dans Argos, sust deuenu amoureux d'Andromede, si elle eust esté de leur teint. s'ay pour moy le consentement de tous les Peintres, & sur tout l'authorité du grand Heliodore qui ne sonde la blancheur de sa diuine Chariclée que sur vn tableau d'Andromede. Ma Scene sera donc s'il vous plaist dans la ville capitale de Cephée, proche de la mer, & pour le nom, vous le luy donnerez tel qu'il vous plaira.

Vous trouverez cet ordre gardé dans les changements de Theatre, que chaque Acte aussi-bien que le Prologue a sa decoration particuliere, & du moins vne machine volante auec vn concert de Musique, que ie n'ay employée qu'à satisfaire les oreilles des spe-Etateurs, tandis que leurs yeux sont arrestez à voir descendre ou remonter vne machine, ou s'attachent à quelque chose qui leur empesche de prester attention à ce que pourroient dire les Acteurs, comme fait le combat de Perfée contre le Monstre : mais ie me suis bien gardé de faire rien chanter qui fust necessaire à l'intelligence de la Piece,parce que communément les paroles qui se chantent estant mal entenduës des auditeurs, pour la confusió qu'y apporte la diuersité des voix qui les prononcent ensemble, elles auroient fait vne grande obscurité dans le corps de l'ouurage, si elles auoient eu à instruire l'Auditeur de quelque chose d'important. Il n'en va pas de mesme des machines, qui ne sont pas dans cette Tragedie comme des agréements détachez, elles en font le nœud & le desnouement, & y sont si necessaires que vous n'en sçauriez retrancher aucune, que vous ne faciez tomber tout l'edifice. l'ay esté affez heureux à les inuenter & à leur donner place dans la tissure de ce Poëme, mais aussi faut-il que i aduoüe que le sieur Torrelli s'est surmonté luy-mesme à en executer les desseins, & qu'il a eu des inventions admirables pour les faire agir à pro-

ARGVMENT.

pos, de sorte que s'il m'est deu quelque gloire pour auoir introduit cette Venus dans le premier Ace, qui fait le nœud de cette Tragedie par l'Oracle ingenieux qu'elle prononce, il luy en est deu bien dauantage pour l'auoir fait venir de si loin & descendre au milieude l'air dans cette magnifique estoille, auec tant d'art & de pompe, qu'elle remplit rout le monde d'estonnement & d'admiration. Il en faut dire autant des autres que i'ay introduites & dont il a inventé l'execution, qui en a rendu le spectacle si merueilleux, qu'il sera mal aisé d'en faire vn plus beau de cette nature. Pour moy ie confesse ingenuement que quelque effort d'imagination que i'aye fait depuis, ie n'ay pû descounrir encor vn suier capable de tant d'ornements exterieurs & où les machines peussent estre distribuées auec tant de iustesse: ie n'en desespere pas touressois, & peut-estre que le temps en fera esclater quelqu'vn affez brillant & affez heureux pour me faire desdire de ce que i'aduance. En attendant receuez celuy-cy comme le plus acheué qui aye encor paru fur nos Theatres, & souffrez que la beauté de la representation supplée au manque des beaux vers que vous n'y trouquerez passen si grande quantité que dans Cinna, ou dans Rodogune, parce que mon principal but icy a esté de satisfaire la veuë par l'esclat & la diversité du spectacle, & noupas de toucher l'esprit par la force du raisonnement, ou le cœur par la delicatesse des passions. Ce n'est pas que i'en aye suy ou negligé aucunes occasions, mais il s'en est rencontré si peu, que i'ayme mieux aduoiier que cette Piece n'est que pour les yeux.

ACTEVRS.

DIEVX dans les Machines.

IVPPITER.

IVNON.

NEPTVNE.

MERCVRE.

LE SOLEIL.

VENVS.

MELPOMENE.

ÆOLE.

CYMODOCE

EPHYRE

CYDIPPE

Huit VENTS.

Nereides,

HOMMES.

CEPHEE Roy d'Ethiopie, pere d'Andromede.
CASSIOPE Reyne d'Ethiopie.
ANDROMEDE fille de Cephée & de Cassiope.
PHINEE Prince d'Ethiopie.
PERSEE fils de Iuppiter & de Danaë.
TIMANTE Capitaine des Gardes du Roy.
AMMON amy de Phinée.
AGLANTE
CEPHALIE
LIRIOPE
Vn Page de Phinée.
Chœur de Peuple.
Suite du Roy.

La Scene est en Ethiopie, dans la ville capitale du Royaume de Cephée.

DECORATION DV PROLOGVE.

Ouuerture du Theatre presente de front aux yeux des Spezchateurs vne vaste montagne, dont les sommets inégaux s'éleuant les vns sur les autres, portent le faiste iusques dans les nuës. Le pied de cette montagne est percé à iour par vne grotte prosonde qui laisse voir la mer en éloignement. Les deux costez du Theatre sont occupez par vne forest d'arbres toussus & entrelassez les vns dans les autres. Sur vn des sommets de la montagne paroist Melpomene, la Muse de la Tragedie, & à l'opposite dans le Ciel on voit le Soleil s'auancer dans vn char tout lumineux, tiré par les quatre cheuaux qu'Ouide luy donne.

ANDRO-



Melpomene vole dans le CharduSoleilety ayant prisplace auprès de luy ils voussent leurs voix et chantent una ralalou ange du Rôy

Back of Foldout Not Imaged



ANDROMEDE TRAGEDIE

PROLOGVE.

LE SOLEIL, MELPOMENE.

MELPOMENE.



Rreste un peu ta course impetueuse, Mon Theatre, Soleil, merite bien tes yeux, Tu n'en vis iamais en ces lieux La pompe plus Majestueuse:

A

2 ANDROMEDE

J'ay reüny, pour la faire admirer, Tout ce qu'ont de plus beau la France & l'Italie,

De tous leurs Arts mes sœurs l'ont embellie, Preste-moy tes rayons pour la mieux éclairer. Daigne à tant de beautez par ta propre lumiere Donner vn parfait agrément, Et rends cette merueille entiere, En luy seruant toy mesme d'ornement.

LE SOLEIL.

Charmante Muse de la Scéne,
Chere & diuine Melpoméne,
Tu sçais de mon destin l'inuiolable loy;
Je donne l'ame à toutes choses,
Je fais agir toutes les causes,
Mais quand ie puis le plus, ie suis le moins à

Par vne puissance plus forte

Le char que ie conduis m'emporte,

Chaque iour sans repos doit & naistre & mourir,

J'en suis esclaue alors que j'y préside,

Et ce frein que ie tiens aux cheuaux que ie guide

Ne regle que leur route & les laisse courir.

TRAGEDIE.

MELPOMENE

La naissance d'Hercule & le festin d'Atrée T'ont fait rompre ces loix,

Et tu peux faire encor ce qu'on t'a veu deux fois Faire en mesme contrée:

Ie dis plus, twele dois en faueur du spectacle Qu'au Monarque des Lys ie prepare aujourd'huy; Le Ciel n'a fait que miracles en luy, Luy voudrois-tu refuser vn miracle?

LE SOLEIL

Non, mais ie le reserue à ces bien-heureux iours
Qu'annoblira sa premiere victoire,
Alors j'arresteray mon cours
Pour estre plus long-temps le témoin de sa gloire.
Pren cependant le soin de le bien divertir,
Et luy faire auec ioye attendre les années
Qui feront esclater les belles Destinées
Des Peuples que son bras luy doit assujettir.
Calliope ta sœur desia d'un œil auide.
Cherche dans l'avenir les faits de ce grand Roy,
Dont les hautes vertus luy donneront employ
Pour plus d'une Iliade, & plus d'une Aeneide.
A y

Que ie porte d'enuie à cette illustre sœur,

Quoy que i'aye à craindre pour elle,

Que sous ce grand fardeau sa force ne chancelle:

Mais quel qu'en soit ensin le merite & l'honneur,

J'auray sur elle au moins cet auantage,

Que desia ie le vois, que desia ie luy plais,

Et que de ses vertus, & que de ses hauts faits,

Desia dans ses pareils ie luy trace une image.

Je luy monstre Pompée, Alexandre, César,

Mais comme des Heros attachez, à son char,

Et tout ce haut esclat où ie les fais paroistre

Luy peint plus qu'ils n'estoient, & moins qu'il ne doit

estre.

LE SOLEIL.

Il en effacera les plus glorieux noms,
Dés qu'il pourra luy mesme animer son armée,
Et tout ce que d'eux tous a dit la Renommée
Te fera voir en luy le plus grand des Bourbons:
Son pere & son ayeul tous rayonnants de gloire,
Ces grands Rois qu'en tous lieux a suiuy la victoire,
Luy voyant emporter sur eux le premier rang,
En demendroient jaloux s'il n'estoit pas leur sang.

TRAGEDIE.

Mais vole dans mon char, Muse, ie veux t'apprendre

Tout l'aduenir d'un Roy qui t'est si precieux.

MELPOMENE.

Ie sçay desia ce qu'on doit en attendre, Et ie lis chaque iour son destin dans les Cieux.

LE SOLEIL.

Vien donc, viens auec moy faire le tour du monde, Qu'vnissant ensemble nos voix Nous facions resonner sur la terre & sur l'onde Qu'il est & le plus ieune & le plus grand des Rois.

MELPOMENE.

Soleil, i'y vole, attends-moy donc de grace.

LE SOLEIL.

Vien, ie t'attends, & te fais place.

Melpoméne vole dans le char du Soleil, & y ayant pris place auprés de luy, ils vnissent leurs voix & chantent cet Air à la louange du Roy; le dernier vers de chaque couplet est repeté par le Chœur de la Musique.

\$000c

Cieux escoutez, escoutez mers profondes,
Et vous antres & bois,
Afreux deserts, rochers battus des ondes,
Redites apres nous d'vne commune voix,
Louys est le plus ieune & le plus grand des Roisi

La Majesté qui desia l'enuironne Charme tous ses François, Il est luy seul digne de sa Couronne, Et quand mesme le Ciel l'auroit mise à leur choix; Il seroit le plus ieune & le plus grand des Rois.

C'est à vos soins, Reine, qu'on doit la gloire De tant de grands exploits, Ils sont par tout suiuis de la victoire, Et l'ordre merueilleux dont vous donnez, ses loix Le rend & le plus ieune & le plus grand des Rois.

LE SOLEIL.

Voilà ce que ie dis sans cesse, Dans tout mon large tour, Mais c'est trop retarder le iour, Allons, Muse, l'heure me presse, Et ma rapidité

Doit regaigner le temps que sur cette Prouince,

Pour contempler ce Prince,

fe me suis arresté.

Le Soleil part auec rapidité, & enleue Melpoméne auec luy dans fon char pour aller publier ensemble la mesme chose au reste de l'Vniuers.

FIN DV PROLOGVE.



DECORATION DV PREMIER ACTE.

Cette grande masse de montagne, & ces rochers esseuez les vns sur les autres qui la composoient, ayant disparu en vn moment par vn merueilleux artisice, laissent voir en leur place la ville capitale du Royaume de Cephée, ou plustost la place publique de cette ville. Les deux costez & le fonds du Theatre sont des Palais magnisiques tous differents de structure, mais qui gardent admirablement l'égalité & les iustesses de la Perspectiue. Apres que les yeux ont eu loisir de se satisfaire à considerer leur beauté, la Reine Cassiope paroit comme passant par cette place publique pour aller au Temple. Elle est conduite par Persée, encor inconnu, mais qui passe pour vn Caualier de grand merite, qu'elle entretient des malheurs publics attendant que le Roy la rejoigne pour aller à ce Temple de compagnie.

ACTE



Back of Foldout Not Imaged



ACTE PREMIER

SCENE PREMIERE.

CASSIOPE, PERSEE,
Suitte de la Reyne.

CASSIOPE.

ENEREVX incognu, qui chez tous les
Monarques
Portez de vos vertus les esclatantes
marques,

Et dont l'aspect suffit à conuaincre nos yeux Que vous sortez du sang ou des Rois, ou des Dieux, Puisque vous auez veu le sujet de ce crime Que chaque mois expie vne telle victime, Cependant qu'en ce lieu nous attendrons le Roy, Soyez-y iuste iuge entre les Dieux & moy.

ANDROMEDE

IO

Iugez de mon forfait, iugez de leur colere, Iugez s'ils ont eu droit d'en punir vne mere, S'ils ont deu faire agir leur hayne au mesme instant.

PERSEE.

I'en ay desia iugé, Reyne, en vous imitant,
Et si de vos malheurs la cause ne procede
Que d'auoir fait iustice aux beautez, d'Androméde,
Si c'est là ce forfait digne d'un tel couroux,
Ie veux estre à iamais coupable comme vous.
Mais come un bruit confus m'apprend ce mal extréme,
Ne le puis-ie, Madame, apprendre de vous-mesme,
Pour mieux renouveler ce crime glorieux
Où soudain la raison est complice des yeux?

CASSIOPE.

Escoutez. La douleur se soulage à se plaindre, Et quelques maux qu'on souffre, ou que l'on aye à Ce qu'un cœur genereux en montre de pitié (craindre, Semble en nostre faueur en prendre la moitié.

Ce fut ce mesme iour qui conclud l'Hymenée De ma chere Androméde auec l'heureux Phinée; Nos peuples tous rauis de ces illustres nœuds Sur les bords de la mer dresserent force jeux, Elle en donnoit les prix : dispensez ma tristesse De vous dépeindre icy leur publique allegresse, On décrit mal la ioye au milieu des malheurs, Et sa plus douce idée est un sujet de pleurs. O iour, que ta memoire encore m'est cruelle! Androméde iamais ne me parut si belle, Et voyant ses regards s'épandre sur les eaux Pour jouir, & juger d'un combat de vaisseaux, Telle, dis-ie, Venus sortit du sein de l'onde, Et promit à ses yeux la conqueste du Monde Quand elle eut consulté sur leur éclat nouveau Les miroirs vagabonds de son flottant berceau.

A ce fameux spectacle on vit les Nereïdes
Leuer leurs moites fronts de leurs palais liquides,
Et pour nouvelle pompe à ces nobles ébats
A l'enuy de la terre estaler leurs appas:
Elles virent ma fille, & leurs regards à peine
Rencontrerent les siens sur cette humide plaine,
Que par des traits plus forts se sentants effacer,
Esblouys & confus ie les vis s'abaisser,
Examiner les leurs, & sur tous leurs visages
En chercher d'assez vifs pour brauer nos rivages,
Ie les vis se choisir insque à cinq & six sois,
Et rougir aussi-tost nous comparant leur choix:
Et cette vanité qu'en toutes les familles
On voit si naturelle aux meres pour leurs filles

Leur cria par ma bouche, en est-il parmy vous,
O Nymphes, qui ne cede à des attraits si doux,
Et nierez-vous encor, vous autres immortelles,
Qu'entre nous la Nature en forme de plus belles?
Je m'emportois sans doute, & c'en estoit trop dit,
Ie les vis s'en cacher de honte & de dépit,
I'en vis dedans leurs yeux les viues estincelles,
L'onde qui les receut s'en irrita pour elles,
I'en vis ensler la vague, & la mer en couroux
Rouler à gros boüillons ses flots insques à nous.

C'eust esté peu des flots, la soudaine tempeste
Qui trouble nostre ioye & disipe la feste,
Enfante en moins d'une heure & pousse sur nos bords
Vn monstre contre nous armé de mille morts.
Nous fuyons, mais en vain, il suit, il brise, il tuë,
Chaque victime est morte aussi-tost qu'abbatuë,
Nous ne voyons qu'horreur, que sang de toutes parts,
Son haleine est poison, & poison ses regards,
Il rompt, il force tout, & sa fureur qui vole
Nos villes & nos champs de iour en iour desole.
Apres beaucoup d'efforts & de væux superflus,
Ayant souffert beaucoup & craignant encor plus,
Nous courons à l'Oracle en de telles alarmes,
Et voicy ce qu'Ammon répondit à nos larmes.

Pour appaiser Neptune, exposez tous les mois Au monstre qui le vange, vne fille à son choix, Iusqu'à ce que le calme à l'orage succede:

Le sort vous monstrera

Celle qu'il agréera;

Differez cependant les nopces d'Androméde.

Comme dans un grad mal un moindre semble doux; Nous prenons pour faueur ce reste de couroux, Le monstre disparu nous rend un peu de ioye, On ne le voit qu'aux iours qu'on luy liure sa proye; Mais ce remede enfin n'est qu'un amusement, Si l'on souffre vn peu moins on craint également, Et toutes nous tremblons deuant vne infortune Qui toutes nous menace auant qu'en frapper vne. La peur s'en renouvelle au bout de chaque mois, J'en ay creu de frayeur desia mourir cinq fois, Desia nous auons veu cinq beautez deuorées, Maie des beautez (Helas!) dignes d'estre adorées, Et de qui tous les traits pleins d'un celeste feu Ne cedoient qu'à ma fille, & luy cedoient bien peu; Comme si choisissant de plus belle en plus belle, Le sort par ces degrez taschoit d'approcher d'elle, Et que pour esleuer ses traits insques à nous Il essayast sa force & mesurast ses coups.

14 ANDROMEDE

Rien n'a pù iusqu'icy toucher ce Dieubarbare, Et le sixième choix aujourd'huy se prépare, On le va faire au Temple, & ie sens malgré moy Des mouuements secrets redoubler mon effroy. Ie sis hier à Venus offrir un sacrifice Qui iamais à mes vœux ne parut si propice, Et toutesois mon cœur à force de trembler Semble prévoir le coup qui le doit accabler.

Vous donc, qui cognoissez & mon crime & sa peine, Dites-moy s'il a pù meriter tant de haine, Et si le Ciel deuoit tant de seuerité Aux premiers mouuements d'vn peu de vanité.

PERSEE.

Ouy, Madame, il est iuste, & j'aduouëray moy-mesme Ou'en le blasmant tantost i'ay commis un blaspheme, Mais vous ne voyez pas dans vostre aueuglement Ouel grand crime il punit d'un si grand chastiment. Les Nymphes de la mer ne luy sont pas si cheres Ou'il veuille s'abaisser à suiure leurs coleres, Et quand vostre mépris en sit comparaison, Il voyoit mieux que vous que vous auiez raison. Il vange (& c'est de là que vostre mal procede) L'injustice renduë aux beautez d'Androméde: Sous les loix d'un mortel vostre choix l'asseruit!
Cette injure est sensible aux Dieux qu'elle rauit,
Aux Dieux qu'elle captiue, & ces riuaux celestes
S'opposent à des nœuds à sa gloire funestes,
En sauuent les appas qui les ont éblouis,
Punissent vos Sujets qui s'en sont réjouis;
Juppiter resolu de l'oster à Phinée
Exprés par son Oracle en deffend l'Hymenée,
A sa slame peut-estre il veut la reseruer,
Ou s'il peut se resoudre ensin à s'en priuer,
A quelqu'un de ses fils sans doute il la destine,
Et voilà de vos maux la secrette origine.
Faites cesser l'offence, & le mesme moment
Fera cesser icy son iuste chastiment.


CASSIOPE.

Vous monstrez pour ma sille vne trop haute estime,
Quand pour la mieux slatter vous me faites vn crime,
Dont la ciuilité me force de iuger
Que vous ne m'accusez qu'asin de m'obliger.
Si quelquesois les Dieux pour des beautez mortelles
Quittent de leur sejour les clartez eternelles,
Ces mesmes Dieux aussi de leur grandeur ialoux
Ne font pas chaque iour ce miracle pour nous.

Et quand pour l'esperer ie serois assez folle, Le Roy dont tout dépend est homme de parole, Il a promis sa fille, & verra tout perir Auant qu'à se dédire il veuille recourir. Il tient cette alliance & glorieuse & chere, Phinée est de son sang, il est fils de son frere.

PERSEE.

Reine, le sang des Dieux vaut bien celuy des Rois: Mais nous en parlerons encor quelque autre fois, Voicy le Roy qui vient.



SCENE II

CEPHEE, CASSIOPE, PHINEE, PERSEE,

Suite du Roy & de la Reine.

CEPHEE.

N'En parlons plus, Phinée, Et laissons d'Andromede aller la Destinée, Vostre Vostre amour fait pour elle vn inutile effort,
Ie la dois comme vne autre au triste choix du sort,
Elle est cause du mal, puisqu'elle l'est du crime,
Peut-estre qu'il la veut pour derniere victime,
Et que nos chastimens deviendroient eternels
S'ils ne pouvoient tomber sur les vrais criminels.

PHINEE.

Est-ce un crime en ces lieux, Seigneur, que d'estre belle?

CEPHEE.

Elle a rendu par là sa mere criminelle.

PHINEE.

C'est donc un crime icy que d'auoir de bons yeux Qui sçachent bien iuger d'un tel present des Cieux.

CEPHEE.

Qui veut en bien iuger n'a point le priuilege D'aller iusqu'au blaspheme & iusqu'au sacrilege.

CASSIOPE.

Ce blaspheme, Seigneur, dequoy vous m'accusez....

CEPHEE.

Madame, apres les maux que vous auez causez C'est à vous à pleurer & non à vous desendre, Voyez, voyez quel sang vous auez fait répandre, Et ne laissez paroistre en cette occasion Que larmes, que soûpirs, & que confusion.

Aphinée le vous le dis encor, elle la creut trop belle, Et peut-estre le sort l'en veut punir en etle, Dérober Andromede à cette eslection C'est dérober sa mere à sa punition.

PHINEE.

Desia cinq fois, Seigneur, à ce choix exposée, Vous voyez que cinq fois le Sort l'a resusée.

CEPHEE.

Si le couroux du Ciel n'en veut point à ses iours, Ce qu'il a fait cinq fois, il le fera tousiours.

PHINEE.

Le tenter si souuent c'est lasser sa clemence, Il pourra vous punir de trop de consiance, Vouloir tousiours faueur c'est trop luy demander, Et c'est vn crime à vous que de tant hazarder. Mais quoy, Seigneur, enfin pour cette fille vnique Point de pitié n'agit, point d'amour ne s'explique?

CEPHEE.

Ah, ne m'arrachez, point mon sentiment secret.

Phinée, il est tout vray, ie l'expose à regret,

J'ayme que vostre amour en sa faueur me presse,

La Nature en mon cœur auec luy s'interesse,

Mais elle ne sçauroit mettre d'accord en moy

Les tendresses d'un pere & les deuoirs d'un Roy,

Et par une instice à moy-mesme seuere

Ie vous resuse en Roy ce que ie veux en pere.

PHINEE.

Quelle est cette instice & quelles sont ces loix Dont l'aueugle rigueur s'estend insques aux Rois?

CEPHEE.

Celles que font les Dieux, qui tous Rois que nous fommes
Punissent nos forfaits ainsi que ceux des hommes,
Et qui ne nous font part de leur sacré pouvoir
Que pour le mesurer aux regles du devoir.
Que diroient mes Sujets si ie me faisois grace,
Et si durant qu'au monstre on expose leur race,

Ils voyoient par un droit tyrannique & honteux Le crime en ma maison & la peine sur eux?

PHINEE.

Heureux sont les Sujets, heureuses les Prouinces Dont le sang peut payer pour celuy de leurs Princes.

CEPHEE.

Mais heureux est le Prince, heureux sont ses projets Quand il se fait iustice ainsi qu'à ses Suiets. Nostre Oracle apres tout n'excepte point ma fille, Ses termes generaux comprennent ma famille, Et ne confondre pas ce qu'il a confondu C'est se mettre au dessus du Dieu qui l'a rendu.

PERSEE.

Seigneur, s'il m'est permis d'entendre vostre Oracle, Ie croy qu'à sa priere il donne peu d'obstacle; Il parle d'Andromede, il la nomme, il sussit, Arrestez vous pour elle à ce qu'il vous en dit; La separer long-temps d'un amant si sidelle C'est tout le chastiment qu'il semble vouloir d'elle, Disserz son Hymen sans l'exposer au choix, Le Ciel assez souvent doux aux crimes des Rois,

Quand il leur a monstré quelque legere haine, Répand sur leurs Suiets le reste de leur peine.

CEPHEE.

Vous prenez mal l'Oracle, & pour l'expliquer mieux, Sçachez,... mais quel éclat vient de frapper mes yeux? D'où partent ces longs traits de nouvelles lumieres?


PERSEE.

Du Ciel qui vient d'ouurir ses luisantes barrieres, D'où quelque Deïté vient ce semble icy bas Terminer elle-mesme entre vous ces debats.

CASSIOPE.

Ah, ie la recognoy, la Deesse d'Erice, C'est elle, c'est Venus à mes vœux si propice, Je voy dans ses regards mon bon-heur renaissant. Peuple, faites des vœux tandis qu'elle descend.

Le Ciel s'ouure durant cette contestation du Roy auec Phinée, & fait voir dans vn profond esloignement l'estoile de Venus qui sert de machine pour apporter cette Deesse iusqu'au milieu du Theatre: Elle s'auance lentement sans que l'œil puisse découurir à quoy elle est suspenduë, & cependant le peuple a loisir de luy adresser ses vœux par cet Hymne que chantent les Musiciens.



SCENE III

VENVS, CEPHEE, CASSIOPE, PERSEE, PHINEE,

Chœur de Musique, Suite du Roy & de la Reine.

CHOEVR de Musique cependat que Venus s'auace.

REine de Paphe & d'Amathonte,
Mere d'Amour & fille de la mer,
Peux-tu voir sans vn peu de honte
Que contre nous elle ait voulu s'armer,
Et que du mesme sein qui fut ton origine
Sorte nostre ruine?

\$00d

Peux-tu voir que de la mesme onde Il ose naistre vn tel monstre apres toy, Que d'où vint tant de bien au monde Il vienne ensin tant de mal & d'effroy, Et que l'heureux berçeau de ta beauté supresme Ensante l'horreur mesme?

Vange l'honneur de ta naissance
Qu'on a souillé par vn tel attentat,
Rends-luy sa premiere innocence,
Et tu rendras le calme à cet Estat,
Et nous dirons que d'où le mal procede,
Part aussi le remede.

CASSIOPE.

Peuple, elle veut parler, silence à la Deesse, Silence, & preparez vos cœurs à l'allegresse, Elle a receu nos vœux & les daigne exaucer, Escoutez-en l'effet qu'elle va prononcer.

VENVS au milieu de l'air.

Ne tremblez plus, mortels, ne tremble plus, o mere,

On va jetter le Sort pour la derniere fois,

Et le Ciel ne veut plus qu'vn choix

Pour appaiser de tout point sa colere:

Andromede ce soir aura l'illustre espoux

Qui seul est digne d'elle & dont seule elle est digne,

Preparez son Hymen, où pour faueur insigne

Les Dieux ont resolu de se joindre auec vous.

PHINEE à Cephée.

Souffrez que sans tarder ie porte à ma Princesse, Seigneur, l'heureux Arrest qu'a donné la Deesse.

CEPHEE.

Allez, l'impatience est trop iuste aux amants.

CASSIOPE voyant remonter Venus.

Suivons la dans le Ciel par nos remerciments, Et d'une voix commune adorant sa puissance. Monstrons à ses faueurs nostre recognoissance.

CHOEVR de Musique cependant que Venus remonte.

Ainsi tousiours sur tes Autels
Tous les mortels
Offrent leurs cœurs en sacrifice,
Ainsi le Zephyre en tout temps
Sur tes palais de Cythere & d'Eryce
Face regner les Graces du Printemps.

\$60g

Daigne affermir l'heureuse paix Qu'à nos souhaits

Vient

Vient de promettre ton Oracle; Et fay pour ces ieunes amants, Pour qui tu viens de faire ce miracle, Vn siecle entier de doux rauissements.

\$60¢

Dans nos campagnes & nos bois
Toutes nos voix
Beniront tes douces atteintes:
Et dans les rochers d'alentour
La mesme Echo qui redisoit nos plaintes,
Ne redira que des soùpirs d'amour.

CEPHEE.

C'est assez, la Deesse est dessa disparuë, Ses dernieres clartez, se perdent dans la nuë; Allons jetter le Sort pour la derniere fois: Malheureux le dernier que foudroyera son choix,

Et dont en ce grand iour la perte domestique Souillera de ses pleurs l'allegresse publique. Madame, cependant songez à préparer Cet Hymen que les Dieux veulent tant honorer, Rendez-en l'appareil digne de ma puissance, Et digne, s'il se peut, d'une telle presence.

26 ANDROMEDE CASSIOPE.

I'obeïs auec ioye, & c'est me commander Ce qu'auec passion i'allois vous demander.



SCENE IV.

CASSIOPE, PERSEE,

Suitte de la Reyne.

CASSIOPE.

ET bien, vous le voyez, ce n'estoit pas vn crime, Et les Dieux ont trouué cet Hymen legitime, Puisque leur ordre exprés nous le fait acheuer, Et que par leur presence ils doiuent l'approuuer. Mais quoy? vous soupirez?

PERSEE.

I'en ay bien lieu, Madame;

CASSIOPE.

Le sujet?

PERSEE.

Vostre ioye.

TRAGEDIE. CASSIOPE

Elle vous gesne l'ame!

PERSEE.

Apres ce que i'ay dit douter d'un si beau feu, Reine, c'est ou m'entendre, ou me croire bien peu; Mais ne me forcez pas du moins à vous le diré; Quand mon ame en fremit, & mon cœur en soûpire. Pouvois-ie avoir des yeux, & ne pas l'adorer, Et pourrois-ie la perdre & n'en pas soûpirer?

CASSIOPE.

Quel espoir formiez-vous puisqu'elle estoit promise, Et qu'en vain son bon-heur domptoit vostre franchise?

PERSEE.

Vouloir que la raison regne sur vn amant, C'est estre plus que luy dedans l'aueuglement. Vn cœur digne d'aymer court à l'objet aymable, Sans penser au succez, dont sa flame est capable, Il s'abandonne entier, & n'examine rien, Aymer est tout son but, aymer est tout son bien, Il n'est difficulté ny peril qui l'estonne.

Dij

Ce qui n'est point à moy n'est encor à personne,
Disois-ie, & ce riual qui possede sa foy,
S'il espere vn peu plus, n'obtient pas plus que moy.
Voilà durant vos maux dequoy viuoit ma flame,
Et les douces erreurs dont ie flattois mon ame;
Pour nourrir des desirs d'un beau seu trop contents
C'estoit assez, d'espoir que d'esperer au temps,
Luy qui fait chaque iour tant de metamorphoses,
Pouvoit en ma faueur faire d'estranges choses:
Mais ensin la Deesse a prononcé ma mort,
Et ie suis ce dernier sur qui tombe le Sort,
I'estois indigne d'elle & de son Hymenée,
Et toutesois, helas! ie valois bien Phinée.

CASSIOPE.

Vous plaindre en cet estat, c'est tout ce que ie puis.

PERSEE.

Vous vous plaindrez peut-estre apprenant qui ie suis. Vous ne vous trompiez point touchant mon origine Lors que vous la iugiez ou Royale, ou Diuine; Mon pere est... Mais pourquoy contre vous l'animer? Tuisqu'il nous faut mourir, mourons sans le nommer, Il vangeroit ma mort si l'auois fait cognoistre De quel illustre sang l'ay la gloire de naistre,

Et vostre grand bon-heur seroit mal asseuré Si vous m'auiez, cognu sans m'auoir preseré. C'est trop perdre de temps, courons à vostre ioye, Courons à ce bon-heur que le Ciel vous enuoye, I'en veux estre témoin, asin que mon tourment Puisse par ce poison sinir plus promptement.

CASSIOPE.

Le temps vous fera voir pour souverain remede Le peu que vous perdez en perdant Andromede, Et les Dieux, dont pour nous vous voyez la bonté, Vous rendront bien-tost plus qu'ils ne vous ont osté.

PERSEE.

Ny le temps ny les Dieux ne feront ce miracle, Mais allons, à vostre heur ie ne mets point d'obstacle, Reyne, c'est l'affoiblir que de le retarder, Et les Dieux ont parlé, c'est à moy de ceder.

FIN DV PREMIER ACTE.

DECORATION DV SECOND ACTE.

Ette Place publique dont la Reine & Perséeviennent de sortir, s'éuanouyt en vn instant, pour faire place à vn Iardin delicieux, & ces grands Palais sont changez en autant de Vases de marbre blanc qui portent alternatiuement, les vns des statuës d'où sortent autant de jets d'eau, les autres des myrthes, des jasmins, & d'autres arbres de cette natute. De chaque costé se détache vn rang d'Orangers dans de pareils Vases, qui viennent former vn admirable berceau iusqu'au milieu du Theatre, & le separent ainsi en trois allées, que l'artissice ingenieux de la Perspectiue fait paroistre longues de plus de mille pas. C'est là qu'on voit Andromede auec ses Nymphes qui cueillent des sleurs, & en coposent vne guirlande dont cette Princesse veut couronner Phinée, pour le recompenser par cette galanterie de la bonne nouuelle qu'il luy vient d'apporter.



Back of Foldout Not Imaged



ACTE II.

SCENE PREMIERE.

ANDROMEDE, Chœur de Nymphes.

ANDROMEDE.



Тмрнея, nostre guirlande est encor mal ornée,

Et deuant qu'il soit peu nous reuerrons Phinée,

Que de ma propre main i'en voulois couronner Pour les heureux aduis qu'il vient de me donner. Toutefois la faueur ne seroit pas bien grande, Et mon cœur apres tout vaut bien vne guirlande: Dans l'estat où le Ciel nous a mis auiourd'huy, C'est l'vnique present qui soit digne de luy.

Quittez, Nymphes, quittez ces peines inutiles, L'augure déplairoit de tant de fleurs steriles, Il faut à nostre Hymen des présages plus doux. Dites-moy cependant laquelle d'entre vous... Mais il faut me le dire, & sans faire les fines.

AGLANTE.

Quoy, Madame?

ANDROMEDE.

A tes yeux ie voy que tu deuines;
Dy-moy donc, d'entre vous laquelle a retenu
En ces lieux iusqu'icy cet illustre Inconnu.
Car ensin ce n'est point sans vn peu de mystere
Qu'vn tel Heros s'attache à la Cour de mon pere,
Quelque chaisne l'arreste, & le force à tarder.
Qu'on ne perde point temps à s'entreregarder,
Parlez, & d'vn seul mot éclaircissez, mes doutes.
Aucune ne répond, & vous rougissez, toutes!
Quoy, toutes l'aymez-vous? vn si parsait amant
Vous a-t'il sçeu charmer toutes également?
Il n'en faut point rougir, il est digne qu'on l'ayme,
Si ie n'aymois ailleurs peut-estre que moy-mesme,
Ouy, peut-estre à le voir si bien fait, si bien né,
Il auroit eu mon cœur s'il n'eust esté donné:

Mais

Mais i'ayme trop Phinée, & le change est un crime.

AGLANTE.

Ce Heros vaut beaucoup puisqu'il a vostre estime, Mais il sçait ce qu'il vaut, & n'a iusqu'à ce iour A pas vne de nous daigné monstrer d'amour.

ANDROMEDE.

Que dis-tu?

AGLANTE.

Pas fait mesme une offre de service.

ANDROMEDE.

Ah! c'est dequoy rougir toutes auec iustice, Et la honte à vos fronts doit bien cette couleur Si tant de si beaux yeux ont pû manquer son cœur.

CEPHALIE.

Où les vostres, Madame, espandent leur lumiere, Le moyen qu'on nous voye ou qu'on nous considere? Les plus viues clartez s'esteignent auprés d'eux, Comme auprés du Soleil meurent les autres seux, Et depuis qu'vn amant à vous voir se hazarde, Il ne voit plus qu'vne ombre alors qu'il nous regarde,

Tant il est éblouy des charmes tout-puissants Qui luy penetrent l'ame & dérobent les sens, Il n'a plus d'yeux pour nous, & par tout où vous estes Il nous est défendu de faire des conquestes.

ANDROMEDE.

Vous estes vne adroite, acheuez, acheuez, C'est peut-estre en esset vous qui le captiuez, Car il ayme, & i'en voy la preuue trop certaine: Chaque sois qu'il me parle il semble estre à la gesne, Son visage & sa voix changent à tous propos, Il hesite, il s'égare au bout de quatre mots, Ses discours vont sans ordre, & plus ie les écoute, Plus j'entends des soùpirs dont j'ignore la route. Où vont-ils, Cephalie, où vont-ils? répondez.

CEPHALIE.

C'est à vous d'en iuger, vous qui les entendez.

VN PAGE de Phinée chantant sans estre veu

Qu'elle est lente, cette journée!

ANDROMEDE.

Taisons-nous, cette voix me parle pour Phinée,

Sans doute il n'est pas loin, & veut à son retour Que des accents si doux m'expliquent son amour.

PAGE chantant sans estre veu.


Qu'elle est lente, cette iournée,
Dont la fin me doit rendre heureux!
Chaque moment à mon cœur amoureux
Semble durer plus d'une année:
O Çiel! quel est l'heur d'un amant,
Si quand il en a l'asseurance,
Sa iuste impatience
Est un nouveau tourment!

Ie dois posseder Andromede:
Iuge, Soleil, quel est mon bien,
Vie-tu iamais amour égal au mien?
Vois-tu beauté qui ne luy cede?
Puis donc que la longueur du iour
De mon nouueau mal est la source,
Précipite ta course,
Et tarde ton retour.

\$00d

Tu luis encor, & ta lumiere Semble se plaire à m'affliger:

Ah! mon amour te va bien obliger A quitter soudain ta carriere: Vien, Soleil, vien voir la beauté Dont le diuin esclat me dompte, Et tu fuiras de honte D'auoir moins de clarté.



SCENE II.

PHINEE, ANDROMEDE,

Chœur de Nymphes, Suite de Phinée.

PHINEE.

CE n'est pas mon dessein, Madame, de surprendre; Puisqu'auant que d'entrer ie me suis fait entendre?

ANDROMEDE.

Vos vœux pour les cacher n'estoient pas criminels, Puisqu'ils suiuent des Dieux les ordres eternels.

PHINEE.

Que me direz-vous donc de leur galanterie?

Que ie vay vous payer de vostre flatterie.

PHINEE.

Comment?

ANDROMEDE.

En vous donnant de semblables témoins Si vous aymez, beaucoup que ie n'ayme pas moins. Approchez, Liriope, & rendez-luy son change, C'est vous, c'est vostre voix que ie veux qui me vange. De grace écoutez-la, nous auons écouté, Et demandons silence apres l'auoir presté.

LIRIOPE chante.

Phinée est plus aymé qu' Andromede n'est belle,
Bien qu'icy bas tout cede à ses attraits,
Comme il n'est point de si doux traits,
Il n'est point de cœur si sidelle:
De mille appas son visage semé
La rend toute merueille,
Mais quoy qu'elle soit sans pareille,
Phinée est encor plus aymé.

Bien que le iuste Ciel face voir que sans crime On la préfere aux Nymphes de la mer, Ce n'est que de sçauoir aymer Qu'elle-mesme veut qu'on l'estime: Chacun d'amour pour elle consumé, D'un cœur luy fait un Temple, Mais quoy qu'elle soit sans exemple, Phinée est encor plus aymé.

Enfin si ses beaux yeux passent pour un miracle, C'est un miracle ausi que son amour, Pour qui Venus en ce beau iour A prononcé ce digne Oracle: Le Ciel luy-mesme en la voyant charmé La iuge incomparable, Mais quoy qu'il l'ait faite adorable, Phinée est encor plus aymé.

Cet air chanté, le Page de Phinée & cette Nymphe font vn Dialogue en Musique, dont chaque couplet a pour refrain l'Oracle que Venus a prononcé au premier Acte en faueur de ces deux Amants, chanté par les deux voix vnies, & repeté par le Chœur entier de la Musique.

PAGE.

Heureux amant!

LIRIOPE.

Heureuse amante!

PAGE.

Ils n'ont qu'vne ame.

LIRIOPE.

Ils n'ont tous deux qu'vn cœur.

PAGE.

Joignons nos voix pour chanter leur bon-heur.

LIRIOPE.

Joignons nos voix pour benir leur attente.

Tous deux ensemble.

Andromede ce soir aura l'illustre espoux Qui seul est digne d'elle & dont seule elle est digne, Préparons son Hymen, où pour faueur insigne Les Dieux ont resolu de se joindre auec nous.

Le Chœur de la Musique.

Préparons son Hymen, où pour faueur insigne Les Dieux ont resolu de se joindre auec nous.

POS S

PAGE.

Le Ciel le veut.

LIRIOPE.

Venus l'ordonne.

PAGE.

L'Amour les joint.

LIRIOPE.

- L'Hymen va les vnir.

PAGE.

Douce vnion que chacun doit benir!

LIRIOPE.

Heureuse amour qu'un tel succet couronne!

Tous

Tous deux ensemble.

Andromede ce soir aura l'illustre espoux Qui seul est digne d'elle & dont seule elle est digne, Préparons son Hymen, où pour faueur insigne Les Dieux ont resolu de se joindre auec nous.

CHOEVR de Musique.


Préparons son Hymen, où pour faueur insigne Les Dieux ont resolu de se joindre auec nous.

ANDROMEDE.

Il n'en faut point mentir, leur accord m'a surprise.

PHINEE.

Madame, c'est ainsi que tout me fauorise, Et que tous vos Sujets soupirent en ces lieux Apres l'heureux effet de cet Arrest des Dieux, Que leurs souhaits vnis...



SCENE III

PHINEE, ANDROMEDE;

TIMANTE, Chœur de Nymphes, Suite de Phinée.

TIMANTE.

AH, Seigneur, ah, Madame!

PHINEE.

Que nous veux-tu, Timante, & qui trouble ton ame?

TIMANTE.

Le pire des malheurs.

PHINEE.

Le Roy seroit-il mort?

TIMANTE.

Non, Seigneur, mais enfin le triste choix du Sort Vient de tomber... Helas! pourray-ie vous le dire?

Est-ce sur quelque objet pour qui ton cœur soùpire?

TIMANTE.

Soupirer à vos yeux du pire de ses coups, N'est-ce pas dire assez qu'il est tombé sur vous?

PHINEE.

Qui te fait nous donner de si vaines alarmes?

TIMANTE.

Si vous n'en croyez pas mes soùpirs & mes larmes, Vous en croirez le Roy, qui bien-tost à vos yeux La va liurer luy-mesme aux Ministres des Dieux.

PHINEE.

C'est nous faire, Timante, vn conte ridicule, Et ie tiendrois le Roy bien simple & bien credule, Si plus qu'vne Deesse il en croyoit le Sort.

TIMANTE.

Le Roy non plus que vous ne l'a pas creu d'abord, F ij

Il a fait par trois fois essayer sa malice, Et l'a veu par trois fois faire mesme injustice, Du vase par trois sois ce beau nom est sorty.

PHINEE.

Et toutes les trois fois le Sort en a menty. Le Ciel a fait pour vous vne autre Destinée, Son ordre est immuable, il veut nostre Hymenée, Il le veut, il y met le bon-heur de ces lieux, Et ce n'est pas au Sort à démentir les Dieux.

ANDROMEDE.

Assez souvent le Ciel par quelque fausse joye Se plaist à prévenir les maux qu'il nous envoye, Du moins il m'a rendu quelques moments bien doux Par ce flatteur espoir que j'allois estre à vous, Mais puisque ce n'estoit qu'vne trompeuse attente, Gardez mon souvenir, & ie mourray contente.

PHINEE.

Et vous mourrez contente! & i'ay pù meriter Qu'auec contentement vous puissiez me quitter, Détacher sans regret vostre ame de la mienne, Vouloir que ie le voye, & que ie m'en souvienne! Et mon fidelle amour qui receut vostre foy
Vous trouue indifferente entre la mort & moy!
Ouy, ie m'en souviendray, vous le voulez, Madame,
f'accepte le supplice où vous liurez mon ame,
Mais quelque peu d'amour que vous me faciez voir
Le mien n'oubliera pas les loix de son deuoir.
Ie dois malgré le Sort, ie dois malgré vous-mesme,
Si vous aymez si mal, vous monstrer comme on ayme,
Et faire recognoistre aux yeux qui m'ont charmé
Que i estois digne au moins d'estre vn peu mieux aymé.
Vous l'aduouerez bien-tost, & i'auray cette gloire
Qui dans tout l'auenir suiura nostre memoire,
Que pour se voir quitter auec contentement,
Vn amant tel que moy n'en est pas moins amant.

ANDROMEDE.

C'est donc trop peu pour moy que des malheurs si proches Si vous ne les croissez par d'injustes reproches!

Vous quitter sans regret! les Dieux me sont témoins
Que i'en monstrerois plus si ie vous aymois moins.

C'est pour vous trop aymer que ie parois toute autre,
I'étousse ma douleur pour n'aigrir pas la vostre,
Ie retiens mes soupirs de peur de vous facher,
Et me monstre insensible afin de moins toucher.

Helas! si vous sçauez, faire voir comme on ayme, Du moins vous voyez, mal quand l'amour est extréme,

Ouy, Phinée, & ie doute en courant à la mort, Lequel m'est plus cruel, ou de vous, ou du Sort.

PHINEE.

Helas! qu'il estoit grand quand ie l'ay creu s'esteindre, Vostre amour, & qu'à tort ma slame ofoit s'en plaindre! Princesse, vous pounez me quitter sans regret, Vous ne perdez en moy qu'un amant indiscret, Qu'un amant temeraire, & qui mesme a l'audace D'accuser vostre amour quand vous luy faites grace; Mais pour moy dont la perte est sans comparaison, Qui perds en vous perdant & lumiere & raison, Ie n'ay que ma douleur qui m'aueugle & me guide, Qui sur toute mon ame elle seule préside, Elle y regne, & ie cede entier à son transport, Mais ie ne cede pas aux caprices du Sort: Que le Roy par scrupule à sa rigueur défere, Qu'one indigne équité le face injuste pere, La Reyne & mon amour sçauront bien empescher Qu'on choix si criminel ne couste on sang si cher. l'ose tout, ie puis tout apres un tel Oracle.

TIMANTE.

La Reyne est hors d'estat d'y joindre aucun obstacle, Surprise comme vous d'vn tel éuenement, Elle en a de douleur perdu tout sentiment, Et sans doute le Roy liurera la Princesse Auant qu'on l'ait pù voir sortir de sa foiblesse.


PHINE E.

Et bien, mon amour seul sçaura jusqu'au trépas, Malgré tous...

ANDROMEDE.

Le Roy vient, ne vous emportez pas.





SCENE IV

CEPHEE, PHINEE, ANDROMEDE, PERSEE,

TIMANTE, Chœur de Nymphes, Suite du Roy & de Phinée.

CEPHEE

MA fille, si tu sçais les nouvelles funestes
De ce dernier effort des coleres celestes,
Si tu sçais de ton Sort l'impitoyable cours
Qui fait le plus cruel du plus beau de nos iours,
Espargne ma douleur, iuges-en par sa cause,
Et va sans me forcer à te dire autre chose.

ANDROMEDE.

Seigneur, ie vous l'aduouë, il est bien douloureux De tout perdre au moment qu'on se doit croire heureux, Et le coup qui surprend vn espoir legitime, Porte plus d'vne mort au cœur de la victime;

Mais

Mais enfin il est iuste, & ie le dois benir,
La cause des malheurs les doit faire sinir,
Le Ciel qui se repent si tost de ses caresses
Verra plus de constance en moy qu'en ses promesses;
Heureuse, si mes iours un peu précipitez.
Satisfont à ces Dieux pour moy seule irritez,
Si ie suis la derniere à leur couroux offerte,
Si le salut public peut naistre de ma perte,
Malheureuse pourtant, qu'un si precieux bien
Vous a desia cousté d'autre sang que le mien,
Et que ie ne suis pas la premiere & l'unique
Qui rende à vostre Estat la seureté publique.

PHINEE.

Quoy! vous vous obstinez encore à me trahir?

ANDROMEDE.

Ie vous plains, ie me plains, mais ie dois obeir.

PHINEE.

Honteuse obeissance à qui vostre amour cede.

CEPHEE.

Obeissance illustre, & digne d'Andromede, Son nom comblé par là d'un immortel honneur...

70 ANDROMEDE PHINEE.

Je l'empescheray bien, ce funeste bon-heur, Andromede est à moy, vous me l'auez, donnée, Le Ciel pour nostre Hymen a pris cette journée, Venus l'a commandé, qui me la peut oster? Le Sort auprés des Dieux se doit-il écouter? Ah! si j'en vois icy les infames Ministres S'aprester aux effets de ses ordres sinistres...

CEPHEE.

Apprenez, que le Sort n'agit que sous les Dieux,
Et souffrez, comme moy le bon-heur de ces lieux.
Vostre perte n'est rien au prix de ma misere,
Si vous estes amant, Phinée, ie suis pere,
Il est d'autres objets dignes de vostre foy,
Mais il n'est point ailleurs d'autre sille pour moy.
Songez, donc mieux qu'vn pere à ces affreux rauages
Que par tout de ce Monstre épandirent les rages,
Et n'en rappelez pas l'épouuantable horreur,
Pour trop croire & trop suiure vne aueugle sureur.

PHINEE.

Que de nouveau ce Monstre entré dessus vos terres Face à tous vos Sujets d'impitoyables guerres, Le sang de tout vn peuple est trop bien employé, Quand celuy de ses Rois en peut estre payé, Et ie ne cognois point d'autre perte publique Que celle où vous condamne vn Sort si tyrannique.

CEPHEE.

Craignez ces mesmes Dieux qui président au Sort.

PHINEE.

Qu'entr'eux-mesmes ces Dieux se mostrent doc d'accord.

Quelle crainte apres tout me pourroit y resoudre?

S'ils m'ostent Andromede, ont-ils quelqu'autre foudre?

Il n'est plus de respect qui puisse rien sur moy,

Andromede est mon Sort, & mes Dieux & mon Roy.

Punissez un impie, & perdez un rebelle,

Satisfaites le Sort en m'exposant pour elle,

I'y cours, mais autrement, ie iure ses beaux yeux,

Et mes uniques Rois, & mes uniques Dieux...

Icy le tonnerre commence à rouler auec vn si grand bruit, & accompagné d'éclairs redoublez auec tant de promptitude, que cette feinte donne de l'épouvante, aussi bien que de l'admiration, tant elle approche du naturel. On voit cependant descendre Æole auec huit Vents, dont quatre sont à ses deux costez, en sorte toute-fois que les deux plus proches sont portez sur le mesme nuage que luy, & les deux plus éloignez sont comme volants en l'air tout con-

tre ce mesme nuage. Les quatre autres paroissent deux à deux au milieu de l'air sur les aisses du Theatre, deux à la main gauche, & deux à la droite. Ce qui n'empesche pas Phinée de continuer ses blasphemes.



SCENE V.

ÆOLE, Huit VENTS, CEPHEE, PERSEE, PHINEE, ANDROMEDE, Chœur de Nymphes, Suite du Roy & de Phinée.

CEPHEE.

A Rrestez, ce nuage enferme une tempeste Qui peut-estre desia menace vostre teste, N'irritez plus les Dieux desia trop irritez.

PHINEE.

Qu'il creue, ce nuage, & que ces Deitez...

CEPHEE.

Ne les irritez plus, vous dis-ie, & prenez garde...

PHINEE.

A les trop irriter, qu'est-ce que ie hazarde?

Que peut craindre vn amant quand il voit tout perdu?

Tombe, tombe sur moy leur foudre s'il m'est deu:

Mais s'il est quelque main assez lâche & traistresse

Pour suiure leur caprice & saistr ma Princesse,

Seigneur, encor vn coup, ie iure ses beaux yeux,

Et mes vniques Rois, & mes vniques Dieux...

ÆOLE au milieu de l'air.

Temeraire mortel, n'en dy pas dauantage, Tu n'obliges que trop les Dieux à te hair, Quoy que pense attenter l'orgueil de ton courage, Ils ont trop de moyens de se faire obeir.

Cognoy-moy pour ton infortune, Ie suis Æole Roy des Vents: Partez mes orageux suiuants, Faites ce qu'ordonne Neptune.

Ce commandement d'Æole produit aussi-tost vn spectacle estrage & merueilleux tout ensemble: Les deux Vents qui estoient à ses costez suspendus en l'air, s'enuolent, l'vn à gauche, & l'autre à droite, deux autres remontent auec luy dans le Ciel sur le mesme nuage qui les vient d'apporter: deux autres qui estoient à sa main gauche sur les aisses du Theatre, s'auancent au milieu de l'air, où ayant sait

vn tour ainsi que deux tourbillons, ils passent au costé droit du Theatre, d'où les deux derniers fondent sur Andromede, & l'ayant saisse chacun par vn bras, l'enleuent de l'autre costé iusques dans les nuës.

ANDROMEDE enleuée par les Vents.


O Ciel!

CEPHEE.

Ils l'ont saisie, & l'enleuent en l'air.

PHINEE courant apres elle & taschant de la retenir.

Ah! ne présumez pas ainse me la voler; Ie vous suiuray par tout malgré vostre surprise.



SCENE IV.

CEPHEE, PERSEE,

Suite du Roy.

PERSEE.

SEigneur, vn tel peril ne veut point de remise, Mais esperez encor, ie vole à son secours, Et vay forcer le Sort à prendre vn autre cours.

CEPHEE.

Vingt amants pour Nerée en firent l'entreprise, Mais il n'est point d'effort que ce Monstre ne brise: Tous voulurent sauuer ses attraits adorez, Tous furent auec elle à l'instant deuorez.

PERSEE.

Le Ciel ayme Andromede, il veut son Hymenée,
Seigneur, & si les Vents l'arrachent à Phinée,
Ce n'est que pour la rendre à quelque illustre espoux
Qui soit plus digne d'elle & plus digne de vous,
A quelqu'autre par là les Dieux l'ont reseruée.
Vous sçaurez qui ie suis, quand ie l'auray sauuée,
Adieu, par des chemins aux hommes inconnus
Ie vay mettre en effet l'Oracle de Venus,
Le temps nous est trop cher pour le perdre en paroles.

CEPHEE.

Moy qui ne puis former d'esperances friuoles, Pour ne voir point courir ce grand cœur au trépas, Ie vay faire des vœux qu'on n'écoutera pas.

FIN DV SECOND ACTE.

DECORATION DV TROISIEME ACTE.

Oicy vne estrange Metamorphose. Sans doute qu'auant que de sortir de ce jardin, Persée a découuert cette monstrueuse teste de Meduse qu'il porte par tout sous son bouclier: Les Myrthes & les Iasmins qui le composoient, sont deuenus des rochers affreux, dont les masses inégalement escarpées & bossuës suiuent si parfaitement le caprice-de la Nature, qu'il semble qu'elle ait plus contribué que l'Art, à les placer ainsi des deux costez du Theatre. C'est enquoy l'artifice de l'ouurier est merueilleux, & se fait voir d'autant plus, qu'il prend soin de se cacher. Les vagues s'emparent de toute la Scéne, à la reserue de cinq ou six pieds qu'elles laissent pour leur seruir de riuage. Elles sont dans vne agitation continuelle, & composent comme vn Golfe enfermé entre ces deux rangs de falaises. On en voit l'emboucheure se dégorger dans la pleine mer , qui paroist si vaste & d'vne si grande estenduë, qu'on jureroit que les vaisseaux qui flottent prés de l'Orizon, dont la veue est bornée, sont éloignez de plus de six lieuës de ceux qui les considerent. Il n'y a personne qui ne iuge, que cet horrible spectacle est le funeste appareil de l'injustice des Dieux, & du supplice d'Andromede : aussi la voit-on au haut des nues, d'où ces deux Vents qui l'ont enleuée, l'apportent auec impetuolité, & l'attachent au pied d'vn de ces rochers.

ACTE



Back of Foldout Not Imaged



ACTE III.

SCENE PREMIERE

ANDROMEDE au pied d'vn Rocher,
Deux VENTS qui l'y attachent,
TIMANTE, CHOEVR

de Peuple sur le riuage.

TIMANTE.



Lions voir, chers amie, ce qu'elle est deuenuë, La Princesse, & mourir, s'il se peut, à sa veuë.

CHOEVR de Peuple.

La voilà que ces Vents acheuent d'attacher En infames bourreaux à ce fatal Rocher.

TIMANTE.

Ouy, c'est elle sans doute. Ah, l'indigne spectacle!

CHOEVR de Peuple.

Si le Ciel n'est injuste, il luy doit vn miracle. Les Vents s'enuolent.

TIMANTE.

Il en fera voir vn, s'il en croit nos desirs.

ANDROMEDE.

O Dieux!

TIMANTE.

Auec respect écoutons ses soupirs, Et puissent les accents de ses premieres plaintes Porter dans tous nos cœurs de mortelles atteintes.

ANDROMEDE.

Affreuse image du trépas, Qu'vn triste honneur m'auoit fardée, Surprenantes horreurs, épouuentable idée, Qui tantost ne m'ébranliez pas;

Que l'on vous conçoit enal, quand on vous enuisage Auec vn peu d'éloignement!

Auec on peu a etotgnement!

Qu'on vous méprise alors, qu'on vous braue aisément!


Mais que la grandeur de courage

Deuient d'un difficile vsage

Lors qu'on touche au dernier moment!



Icy seule, & de toutes parts
A mon Destin abandonnée,
Icy que ie n'ay plus ny parents, ny Phinée,
Sur qui destourner mes regards,
L'attente de la mort de tout mon cœur s'empare,
Il n'a qu'elle à considerer,
Et quoy que de ce Monstre il s'ose figurer,
Ma constance qui s'y prépare,
Le trouve d'autant plus barbare,



Estrange effet de mes malheurs! Mon ame traisnante, abbatuë, N'a qu'vn moment à viure, & ce moment me tuë

A force de vines douleurs:

Ma frayeur a pour moy mille mortelles feintes, Cependant que la mort me fuit;


Je pasme au moindre vent, ie meurs au moindre bruit,

Et mes esperances esteintes N'attendent la fin de mes craintes, Que du Monstre qui les produit.

Hij



Qu'il tarde à suiure mes desirs,
Et que sa cruelle paresse
A ce cœur, dont ma flame est encor la maistresse,
Couste d'amers & longs soùpirs!
O toy, dont iusqu'icy la douceur m'a suivie,
Va-t'en, souvenir indiscret,
Et cessant de me faire vn entretien secret
De ce Prince qui m'a servie,
Laisse-moy sortir de la vie



C'est assez que tout l'Vniuers
Conspire à faire mes supplices,
Ne les redouble point, toy qui fus mes delices,
En me monstrant ce que ie perds:
Laisse-moy...



SCENE II.

CASSIOPE, ANDROMEDE, TIMANTE, CHOEVR de Peuple.

CASSIOPE.

Me voicy, iustes Dieux, prenez vostre victime,
S'il est quelque iustice encore parmy vous,
C'est à moy seule, à moy qu'est deu vostre couroux.
Punir les innocents; E laisser les coupables,
Inhumains, est-ce en estre, est-ce en estre capables?
A moy tout le supplice, à moy tout le forfait.
Que faites-vous, cruels? qu'auez-vous presque fait?
Andromede est icy vostre plus rare ouurage,
Andromede est icy vostre plus digne image,
Elle rassemble en soy vos attraits divisez,
On vous cognoistra moins, si vous la destruisez.
Ah, ie découvre ensin d'où provient tant de haine,
Vous en estes jaloux plus que ie n'en su vaine,

Si vous la laissiez viure, enuieux Tout-puissants, Elle auroit plus que vous, & d'Autels, & d'encens, Chacun préféreroit le portrait au modele, Et bien-tost l'Vniuers n'adoreroit plus qu'elle.

ANDROMEDE.

En l'estat où ie suis le Sort m'est-il trop doux; Si vous ne me donnez dequoy craindre pour vous? Faut-il encor ce comble à des malheurs extrémes? Qu'esperez-vous, Madame, à force de blasphemes?

CASSIOPE.

Attirer & leur Monstre & leur foudre sur moy,
Mais ie ne les irrite, helas! que contre toy:
Sur ton sang innocent retombent tous mes crimes,
Seule, tu leur tiens lieu de mille autres victimes,
Et pour punir ta mere, ils n'ont, ces cruels Dieux,
Ny Monstre dans la mer, ny foudre dans les Cieux.
Ausi sçauent-ils bien que se prendre à ta vie,
C'est perçer de mon cœur la plus tendre partie,
Que ie souffre bien plus en te voyant perir,
Et qu'ils me feroient grace en me faisant mourir.
Ma fille, c'est donc là cet heureux Hymenée,
Cette illustre vnion par Venus ordonnée,

Qu'auecque tant de pompe il falloit préparer, Et que ces mesmes Dieux devoient tant honorer! Ce que nos yeux ont veu, n'estoit-ce donc qu'vn songe, Deesse, ou ne viens-tu que pour dire vn mensonge? Nous aurois-tu parlé sans l'adueu du Destin? Est-se ainsi qu'à nos maux le Ciel trouve vne fin? Est-ce ainsi qu' Andromede en reçoit les caresses? Si contrelle l'Enuie esmeut quelques Deesses, L'Amour en sa faueur n'arme-t'il point de Dieux? Sont-ils tous deuenus, ou sans cœur, ou sans yeux? Le maistre souverain de toute la Nature Pour de moindres beautez a changé de figure, Neptune a soupiré pour de moindres appas, Elle en montre à Phæbus que Daphné n'auoit pas, Et l'Amour en Psyché voyoit bien moins de charmes Quand pour elle il daigna se blesser de ses armes. Qui dérobe à tes yeux le droit de tout charmer, Ma fille? au vif éclat qu'ils sement dans la mer, Les Tritons amoureux, malgré leurs Nereïdes, Deuroient desia sortir de leurs grottes humides, Aux fureurs de leur Monstre à l'enuy s'opposer, Contre ce mesme écueil eux-mesmes l'écraser, Et de ses os brisez, de sa rage estouffée, Au pied de ton Rocher t'esseuer vn trophée.

ANDROMEDE voyant venir

le Monstre de loin.

Renouueler le crime, est-ce pour les sléchir?

Vous hastez mon supplice au lieu de m'affranchir,

Vous appelez le Monstre. Ah! du moins à sa veuë

Quittez la vanité qui m'a dessa perduë,

Il n'est mortel ny Dieu qui m'ose secourir,

Il vient, consolez-vous, & me laissez mourir.

CASSIOPE.

Ie le voy, c'en est fait. Parois du moins, Phinée, Pour sauuer la beauté qui t'estoit destinée, Parois, il en est temps, viens en dépit des Dieux Sauuer ton Andromede, ou perir à sés yeux, L'amour te le commande, & l'honneur t'en conuie; Peux-tu, si tu la perds, aymer encor la vie?

ANDROMEDE.


Il n'a manque d'amour ny manque de valeur, Mais sans doute, Madame, il est mort de douleur, Et comme il a du cœur & sçait que ie l'adore, Il periroit icy, s'il respiroit encore.

CASSIOPE.

Dy plustost que l'ingrat n'ose te meriter.

Toy done, qui plus que luy t'osois tantost vanter, Viens, amant incognu, dont la haute origine, Si nous t'en voulons croire, est Royale, ou Divine, Viens-en donner la preuue, & par un prompt secours Fay-nous voir quelle foy l'on doit à tes discours, Supplante ton rival par une illustre audace, Viens à droit de conqueste en occuper la place, Andromede est à toy, si tu l'oses gaigner. Quoy, lasches, le peril vous la fait dédaigner! Il esteint en tous deux ces flames sans secondes! Allons, mon desespoir, iusqu'au milieu des ondes Faire seruir l'effort de nos bras impuissants D'exemple & de reproche à leurs feux languissants, Faisons ce que tous deux deuroient faire auec ioye, Destourpons sa fureur dessus vne autre proye, Heureuse, si mon sang la pouvoit assouvir; Allons, mais qui m'arreste? ah! c'est mal me servir.

On voit icy Persée descendre du haut des nuës,



SCENE III.

ANDROMEDE attachée au Rocher, PERSEE en l'air sur le cheual Pegase, CASSIOPE, TIMANTE, & le CHOE VR sur le Riuage.

> TIMANTE monstrant Persée à Cassiope, & l'empeschant de se jetter en la mer.

Ourez-vous à la mort, quand on vole à vostre ayde? Voyez par quels chemins on secourt Andromede, Quel Heros, ou quel Dieu sur ce cheual aisté...

CASSIOPE.

Ah! c'est cet incognu par mes cris appelé, C'est luy-mesme, Seigneur, que mon ame estonnée....

PERSEE en l'air.

Reyne, voyez par là si ie vaux bien Phinée,

Si j'estois moins que luy digne de vostre choix, Et si le sang des Dieux cede à celuy des Rois.

CASSIOPE.

Rien n'égale, Seigneur, vne amour si fidelle, Combatez donc pour vous, en combatant pour elle, Vous ne trouuerez point de sentiments ingrats.

PERSEE à Andromede.

Adorable Princesse, aduouez-en mon bras.

CHOEVR de Musique cependant que Persée combat le Monstre.

Courage, enfant des Dieux, elle est vostre conqueste, Et iamais amant ny guerrier Ne vit ceindre sa teste D'vn si beau myrthe, ou d'vn si beau laurier.

Vne voix seule.

Andromede est le prix qui suit vostre victoire, Combatez, combatez, Et vos plaisirs & vostre gloire Rendront jaloux les Dieux dont vous sortez.

I ij

Le CHOEVR repete.

Courage, enfant des Dieux, elle est vostre conqueste,
Et iamais amant ny guerrier
Ne vit ceindre sa teste
D'vn si beau myrthe, ou d'vn si beau laurier.

Vne voix seule.

La défaite du Monstre à tout autre inuincible Se reservoit pour vous, Et quoy qu'on la tienne impossible, Vous pouvez tout sous vn espoir si doux.

Le CHOEVR repete.

Courage, enfant des Dieux, elle est vostre conqueste; Et iamais amant ny guerrier Ne vit ceindre sa teste D'vn si beau myrthe, ou d'vn si beau laurier.

TIMANTE à la Reyne.

Voyez de quel effet nostre attente est suivie, Madame, elle est sauvée, & le Monstre est sans vie.

PERSEE ayant tué le Monstre.

Rendez grace à l'Amour, qui m'en a fait vainqueur.

O Ciel! que ne vous puis-ie assez ouurir mon cœur?
L'Oracle de Venus enfin s'est fait entendre,
Voilà ce dernier choix qui nous deuoit tout rendre,
Et vous estes, Seigneur, l'incomparable espoux,
Par qui le sang des Dieux doit se joindre auec nous.
Ne pense plus, ma fille, à ton ingrat Phinée,
C'est à ce grand Heros que le Sort t'a donnée,
C'est pour luy que le Ciel te destine aujourd'huy,
Il est digne de toy, rends-toy digne de luy.

PERSEE.

Il faut la meriter par mille autres services,
Vn peu d'espoir sussit pour de tels sacrisices.
Princesse, cependant quittez ces tristes lieux
Pour rendre à vostre Cour tout l'éclat de vos yeux.
Ces Vents, ces mesmes Vents qui vous ont enleuée,
Vont rendre de tout point ma victoire acheuée,
L'ordre que leur prescrit mon pere suppiter
Jusqu'en vostre Palais les force à vous porter,
Les force à vous remettre où l'on vous a veu prise.

ANDROMEDE.

D'une frayeur mortelle à peine encor remise,

Pardonnez, grand Heros, si mon estonnement N'a pas la liberté d'aucun remerciement.

PERSEE.

Venez, Tyrans des mers, reparer vostre crime, Venez restituer cette illustre victime, Meritez vostre grace, impetueux mutins, Par vostre obeissance au maistre des Destins.

Les Vents obeissent aussi-tost à ce commandement de Persée, & on les voit en vn moment détacher cette Princesse, & la reporter par dessus les stots iusques au lieu d'où ils l'auoient apportée au commencement de cet Acte. En mesme temps Persée reuole en haut sur son cheual aissé, & apres auoir fait vn caracol admirable au milieu de l'air, il tire du mesme costé qu'on a veu disparoistre la Princesse. Tandis qu'il vole, tout le riuage retentit de cris de ioye & de chants de victoire.

CASSIOPE voyant Persée reuoler

en haut apres sa victoire.
Peuple, qu'à pleine voix l'allegresse publique,
Apres vn tel miracle, en triomphe s'explique,
Et face retentir sur ce riuage heureux
L'immortelle valeur d'vn bras si genereux.

CHOEVR de Musique.

Le Monstre est mort, crions victoire, Victoire tous, victoire à pleine voix, Que nos campagnes & nos bois Ne refonnent que de sa gloire, Princesse, elle vous donne enfin l'illustre espoux Qui seul estoit digne de vous.

\$000c

Vous estes sa digne conqueste,
Victoire tous, victoire à son amour,
C'est luy qui nous rend ce beau iour,
C'est luy qui calme la tempeste:
Et c'est luy qui vous donne ensin l'illustre espoux
Qui seul estoit digne de vous.

CASSIOPE apres que Persée est disparu.

Dieux, j'estois sur ces bords immobile de ioye! Allons voir où ces V ents ont reporté leur proye, Embrasser ce vainqueur, & demander au Roy L'esfet du bel espoir qu'il a receu de moy.



SCENE IV

Trois NEREIDES s'éleuat du milieu des flots.

CYMODOCE.

A Insi nostre colere est de tout point brauée, Ainsi nostre victime à nos yeux enleuée Va croistre les douceurs de ses contentemens, Par le iuste mépris de nos ressentimens.

EPHYRE.

Toute nostre fureur, toute nostre vangeance Semble auec son Destin estre d'intelligence, N'agir qu'en sa faueur, & ses plus rudes coups Ne font que luy donner un plus illustre espoux.

CYDIPPE.

Le Sort, qui iusqu'icy nous a donné le change, Immole à ses beautez le Monstre qui nous vange: Du mesme sacrifice, & dans le mesme lieu, De victime qu'elle est, elle devient le Dieu.

Cessons


Cessons d'oresnauant, cessons d'estre immortelles,
Puisque les Immortels trahijsent nos querelles,
Ou'vne beauté commune est plus chere à leurs yeux,
Car son liberateur est sans doute un des Dieux;
Autre qu'un Dieu n'eust pù nous oster cette proye,
Autre qu'un Dieu n'eust pù prendre une telle voye,
Et ce cheual aissé fust pery mille sois,
Auant que de voler sous un indigne poids.

CYMODOCE.

Ouy, c'est sans doute un Dieu qui vient de la desendre, Mais il n'est pas, mes sœurs, encor temps de nous rendre, Et puisqu'un Dieu pour elle ose nous outrager, Il faut trouuer aussi des Dieux à nous vanger. Du sang de nostre Monstre encore toutes teintes Au Palais de Neptune allons porter nos plaintes, Luy demander raison de l'immortel affront Qu'une telle défaite imprime à nostre front.

CYDIPPE.

Ie croy qu'il nous prévient, les ondes en bouillonnent, Les Conques des Tritons dans ces rochers resonnent, C'est luy-mesme, parlons.



SCENE V.

NEPTVNE, Les NEREIDES.

NEPTVNE dans son Char, formé d'vne grande Conque de Nacre, & tiré par deux cheuaux marins.

Mes filles, & ie viens au bruit de vos soupirs.

De l'affront qu'on vous fait plus que vous en colere,
C'est moy que tyrannise vn superbe de frere,
Qui dans mon propre Estat m'osant faire la loy,
M'enuoye vn de ses fils pour triompher de moy.
Qu'il regne dans le Ciel, qu'il regne sur la Terre,
Qu'il gouverne à son gré l'éclat de son Tonnerre,
Que mesme du Destin il soit independant,
Mais qu'il me laisse à moy gouverner mon Trident.
C'est bien assez pour luy d'vn si grand avantage,
Sans me venir braver encor dans mon partage;
Apres cet attentat sur l'Empire des mers,
Mesme honte à leur tour menace les Enfers;

Außi leur Souuerain prendra nostre querelle:
Ie vay l'interesser auec Iunon pour elle,
Et tous trois assemblants nostre pouuoir en vn,
Nous sçaurons bien dompter nostre tyran commun.
Adieu, consolez, vous, Nymphes trop outragées,
Ie periray moy-mesme, ou vous serez vangées,
Et i'ay sçeu du Destin qui se ligue auec nous,
Qu'Andromede icy bas n'aura iamais d'espoux.

Il fond au milieu de la mer.

CYMODOCE.

Apres le doux espoir d'une telle promesse, Reprenons, cheres sæurs, une entiere allegresse. Les Nereïdes se plongent aussi dans la mer.

FIN DV TROISIESME ACTE.

DECORATION DV QVATRIEME ACTE.

Es vagues fondent sous le Theatre, & ces hideuses masses de pierre dont elles battoient le pied, font place à la magnificence d'yn Palais Royal. On ne le voit pas tout entier, on n'en voit que le Vestibule, ou plustost la grande salle, qui doit seruir aux nopces de Persée & d'Andromede. Deux rangs de colomnes de chaque costé, l'vn de rondes, & l'autre de quarrées en font les ornements: Elles sont enrichies de statuës de marbre blanc d'vne grandeur naturelle, & leurs bases, corniches, amortissemens, estalent tout ce que peut la iustesse de l'Architecture: Le frontispice suit le mesme ordre, & par trois portes dont il est percé, fait voir trois allées de Cyprés, où l'œil s'enfonce à perte de veuë. Persée paroist le premier dans cette salle conduisant Andromede à son apartement, apres l'auoir obtenuë du Roy & de la Reine; & comme si leur volonté ne suffisoit pas, il tâche encor de l'obtenir d'elle-mesme par les respects qu'il luy rend, & les submissions extraordinaires qu'il luy fait.



Back of Foldout Not Imaged



ACTE IV.

SCENE PREMIERE

ANDROMEDE, PERSEE, CHOEVR de Nymphes, Suite de Persée.

PERSEE.



VE me permettez-vous, Madame, d'esperer?

Vostre amour est-ce vn bien où ie doine aspirer?

Et puis-ie en cette illustre & diuine journée, Pretendre iusqu'au cœur que possedoit Phinée?

ANDROMEDE.

Laissez-moy l'oublier puisqu'on me donne à vous, Et s'il l'a possedé n'en soyez point jaloux,

Le choix du Roy l'y mit, le choix du Roy l'en chasse, Ce mesme choix du Roy vous y donne sa place, N'exigez rien de plus, ie ne sçay point hair, Ie ne sçay point aymer, mais ie sçais obeir, Ie sçay porter ce cœur à tout ce qu'on m'ordonne, Il suit aueuglement la main qui vous le donne, De sorte, grand Heros, qu'apres le choix du Roy, Ce que vous demandez, est plus à vous qu'à moy.

PERSEE.

Que ie puisse abuser ainsi de sa puissance!
Hazarder vos plaisirs sur vostre obeissance!
Et de liberateur de vos rares beautez
M'esleuer en tyran dessus vos volontez!
Princesse, mon bon-heur vous auroit mal seruie
S'il vous faisoit esclaue en vous rendant la vie,
Et ne vous conseruoit des iours si precieux
Que pour les attacher sous vn joug odieux.
C'est aux courages bas, c'est aux amants vulgaires,
A faire agir pour eux l'authorité des peres,
Souffrez à mon amour des chemins differents;
f'ay veu parler pour moy, les Dieux, & vos
parents,
Ie sens que mon espoir s'ensle de leur suffrage,

Mais ie n'en veux enfin tirer autre auantage,
Que de voir cet amour faire hommage à vos yeux
Du choix de vos parents, & du vouloir des Dieux.
Ils vous donnent à moy, ie vous rends à vous-mesme,
Et comme c'est vostre heur & non le mien que i'ayme,
I'ayme mieux m'exposer à perdre vn bien si doux
Que de vous obtenir d'un autre que de vous.
Il garde cet espoir, & hazarde le reste,
Et me soit vostre choix, ou propice, ou funeste,
Je beniray l'Arrest qu'en feront vos desirs,
Si ma mort vous épargne un peu de déplaisirs.
Remplissez mon espoir, ou trompez mon attente,
Ile mourray sans regret, si vous viuez, contente,
Et mon trépas n'aura que d'aymables momens,
S'il vous oste un obstacle à vos contentemens.

ANDROMEDE.

C'est trop d'estre vainqueur dans la mesme journée Et de ma retenuë, & de ma Destinée. Apres que par le Roy vos vœux sont exaucez, Vous parler d'obeir, c'estoit vous dire assez: Mais vous voulez douter asin que ie m'explique, Et que vostre victoire en deuienne publique; Sçachez donc...

Non, Madame, où i'ay tant d'interest Ce n'est pas deuant moy qu'il faut faire l'Arrest. L'excez de vos bontez pourroit en ma presence Faire à vos sentimens un peu de violence; Ce bras vainqueur du Monstre, & qui vous rend le iour, Pourroit en ma faueur seduire vostre amour; La pitié de mes maux pourroit mesme surprendre Ce cœur trop genereux pour s'en vouloir defendre; Et le moyen qu'un cœur, ou seduit, ou surpris, Fust iuste en ses faueurs, ou iuste en ses mépris? De tout ce que i'ay fait, ne voyez que ma flame, De tout ce qu'on vous dit, ne croyez que vostre ame, Ne me respondez point, & consultez-la bien, Faites vostre bon-heur sans aucun soin du mien, Ie luy voudrois du mal s'il retranchoit du vostre, S'il vous pouvoit couster un soupir pour quelqu'autre, Et si quittant pour moy quelques destins meilleurs, Vostre deuoir laissoit vostre tendresse ailleurs. Je vous le dis encor dans ma plus douce attente, Ie mourray trop content si vous viuez contente, Et si l'heur de ma vie ayant sauné vos iours, La gloire de ma mort asseure vos amours.

Adieu,

Adieu, ie vais attendre ou triomphe, ou supplice, L'un comme effet de grace, & l'autre de justice.

ANDROMEDE.

A ces profonds respects qu'icy vous me rendez,
Ie ne replique point, vous me le deffendez:
Mais quoy que vostre amour me condamne au silence,
Je vous diray, Seigneur, malgré vostre deffence,
Qu'vn Heros tel que vous ne sçauroit ignorer,
Qu'ayant tout merité l'on doit tout esperer.



SCENE II.

ANDROMEDE, Chœur de Nymphes.

ANDROMEDE.

NI mphes, l'auriez vous creu, qu'en moins d'vne jourl'aymasse de la sorte vn autre que Phinée? (née Le Roy l'a commandé, mais de mon sentiment le m'offrois en secret à son commandement, Ma flame impatiente inuoquoit sa puissance, Et couroit au deuant de mon obeissance.

L

Ie fay plus, au seul nom de mon premier vainqueur, L'amour à la colere abandonne mon cœur, Et ce captif rebelle, ayant brisé sa chaisne, Va iusques au dédain, s'il ne passe à la haine. Que direz-vous d'un change & si prompt, & si grand, Qui dans ce mesme cœur moy-mesme me surprend?

AGLANTE.

Que pour faire un bon-heur promis par tant d'Oracles, Cette grande journée est celle des miracles, Et qu'il n'est pas aux Dieux besoin de plus d'effort, A changer vostre cœur, qu'à changer vostre Sort. Get Empire absolu qu'ils ont dessus nos ames Esteint comme il leur plaist & rallume nos slames, Et verse dans nos cœurs, pour se faire obeir, Des principes secrets d'aymer & de hair. Nous en voyions au vostre en cette haute estime Que vous nous témoigniez pour ce bras magnanime; Au defaut de l'amour que Phinée emportoit, Il luy donnoit deslors tout ce qui luy restoit, Deslors ces mesmes Dieux, dont l'ordre s'execute, Le panchoient du costé qu'ils préparoient sa cheute, Et cette haute estime attendant ce beau iour, N'estoit qu'un beau degré pour monter à l'amour.

CEPHALIE.

Vn digne amour succede à cette haute estime,
Si ie puis toute sois vous le dire sans crime,
C'est hazarder beaucoup que croire entierement
L'impetuosité d'un si prompt changement.
Comme pour vous Phinée eut jadis quelques charmes,
Peut-estre il ne luy faut qu'un soûpir & deux larmes,
Pour disiper un peu de cette auidité
Qui d'un torrent si gros suit la rapidité.
Deux amants que separe une legere offence
Reprennent aisément leur vieille intelligence,
Vous reuerrez en luy ce qui le sit aymer,
Les mesmes qualitez qu'il vous pleust estimer...

ANDROMEDE.

Et i'y verray de plus cette ame lasche & basse
Iusqu'à m'abandonner à toute ma disgrace,
Cet ingrat trop aymé qui n'osa me sauuer,
Qui me voyant perir voulut se conseruer,
Et creut s'estre acquité deuant ce que nous sommes
En blashhemant les Dieux, & menaçant les hommes.
S'il eust... Mais le voicy, voyons si ses discours
Rompront de ce torrent ou grossiront le cours.

L ij

SCENE III

ANDROMEDE, PHINEE, AMMON, CHOEVR de Nymphes, Suite de Phinée.

PHINEE.

Suivent les mouvements d'une fonte y confere que ie ne puis croire, Dient sçavoir s'il est vray que vous soyez d'accord, Par vn change honteux, de l'Arrest de ma mort. Non que ie sois surpris que le Roy, que la Reyne, Suivent les mouvements d'une foiblesse humaine; Tout ce qui me surprend ce sont vos volontez. On vous donne à Persée, & vous y consentez! Et toute vostre foy demeure sans defense Alors que de mon bien on fait sa recompense!

ANDROMEDE.

Ouy, j'y consents, Phinée, & j'y dois consentir; Et quel que soit ce bien qu'il a sçeu garantir, Sans vous faire injustice on en fait son salaire, Quand il a fait pour moy ce que vous deuiez faire. Mais quel droit aue \(-vous de nommer vostre vn bien Ou vostre peu de cœur ne prétendoit plus rien? Quoy, vous pounez souffrir qu'un Monstre me deuore, Et ce Monstre estant mort ie suis à vous encore! Quand ie sors de peril vous reuenez à moy! Vous auez de l'amour, & ie vous dois ma foy! C'estoit de sa fureur qu'il me falloit deffendre, Si vous vouliez garder quelque droit d'y pretendre: Ce demy-Dieu n'a fait, quoy que vous pretendiez, Que m'arracher au Monstre à qui vous me cedie?. Quittez donc cette vaine & temeraire idée, Ne me demandez plus quand vous m'auez cedée, Ce doit estre pour vous mesme chose aujourd'huy, Ou de me voir au Monstre, ou de me voir à luy.

PHINEE.

Qu'ay-ie oublié pour vous de ce que i'ay pù faire? N'ay-ie pas des Dieux mesme attiré la colere? Lors que ie vis Æole armé pour m'en punir Fut-il en mon pouvoir de vous mieux retenir? N'eurent-ils pas besoin d'vn éclat de tonnerre, Ses ministres aisle, pour me jetter par terre?

Et voyant mes efforts auorter sans effets, Quels pleurs n'ay-ie versez, & quels vœux n'ay-ie faits?

ANDROMEDE.

Vous auez donc pour moy daigné verser des larmes; Lors que pour me defendre vn autre a pris les armes! Et dedans mon peril vos sentiments ingrats S'amusoient à des vœux quand il falloit des bras!

PHINEE.

Que pouvois-ie de plus, ayant veu pour Nerée De vingt amants armez la troupe devorée? Devois-ie encor promettre vn succez à ma main, Qu'on voyoit au dessus de tout l'effort humain? Devois-ie me flatter de l'espoir d'vn miracle?

ANDROMEDE.

Vous deuiez l'esperer sur la foy d'un Oracle, Le Ciel l'auoit promis par un Arrest si doux, Il l'a fait par un autre, & l'auroit fait par vous. Mais quand vous auriez creu vostre perte asseurée, Du moins ces vingt amants deuorez pour Nerée Vous laissoient un exemple, & noble, & glorieux, Si vous n'eussiez pas craint de perir à mes yeux. Ils voyoient de leur mort la mesme certitude, Mais auec plus d'amour & moins d'ingratitude, Tous voulurent mourir pour leur objet mourant: Que leur amour du vostre estoit bien different! L'effort de leur courage a produit vos alarmes, Vous a reduit aux vœux, vous a reduit aux larmes, Et quoy que plus heureuse en un semblable Sort, Ie voy d'un œil jaloux la gloire de sa mort. Elle auoit vingt amants qui voulurent la suiure, Et ie n'en auois qu'vn qui m'a voulu suruiure. Encor ces vingt amants qui vous ont alarmé N'estoient pas tous aymez, & vous estiez aymé; Ils n'auoient la pluspart qu'une foible esperance, Et vous auiez, Phinée, une entiere asseurance, Vous possediez mon cœur, vous possediez ma foy, N'estoit-ce point assez pour mourir auec moy? PounieZ-vous,...

PHINE E.

Ah, de grace, imputeZ-moy, Madame, Les crimes les plus noirs qu'ose enfanter vne ame, Mais ne soupçonnez point ce malheureux amant De vous pouvoir iamais survivre vn seul moment. J'épargnois à mes yeux vn funeste spectacle, Où mes bras impuissants n'avoient pû mettre obstacle,

88. ANDROMEDE

Et tenois ma main preste à seruir ma douleur Aumoindre & premier bruit qu'eust fait vostre malheur.

ANDROMEDE.

Et vos respects trouuoient une digne matiere A me laisser l'honneur de perir la premiere! Ah! c'estoit à mes yeux qu'il falloit y courir, Si vous auiel pour moy cette ardeur de mourir, Vous ne me deuiel pas enuier cette ioye. De voir offrir au Monstre une premiere proye: Vous m'auriez desarmé la mort de ses horreurs, Vous m'auriel fait du Monstre adorer les fureurs; Et luy voyant ouurir ce gouffre épouventable, Ie l'aurois regardé comme un port fauorable, Comme vn viuant sepulchre, où mon cœur amoureux Eust brûlé de rejoindre vn amant genereux. l'aurois desaduoiié la valeur de Persée, En me sauuant la vie il m'auroit offensée, Et de ce mesme bras qu'il m'auroit conserué, Ie vous immolerois ce qu'il m'auroit sauné, Ma mort auroit desia couronné vostre perte; Et la bonté du Ciel ne l'auroit pas soufferte. C'est à vostre refus que les Dieux ont remis En de plus dignes mains ce qu'ils m'auoient promis, Mon

TRAGEDIE.

89

Mon cœur eust mieux aymé le tenir de la vostre:

Mais ie vis par vn autre, & viuray pour vn autre.

Vous n'auez, pas de lieu d'en deuenir jaloux,

Puisque sur ce rocher j'estois morte pour vous,

Qui pouvoit le souffrir, peut me voir sans envie.

Viure pour vn Heros de qui ie tiens la vie,

Et quand l'amour encor me parleroit pour luy,

Ie ne puis disposer des conquestes d'autruy.

Adieu.



SCENE IV.

PHINEE, AMMON, Suite de Phinée.

PHINEE.

Ous voulez, donc que i'en face la mienne, Cruelle, & que ma foy de mon bras vous obtienne? Et bien, nous l'irons voir, ce bien-heureux vainqueur, Qui triomphant d'vn Monstre a dompté vostre cœur : C'estoit trop peu pour luy d'vne seule victoire, S'il n'eust dedans ce cœur triomphé de ma gloire.

Mais si sa main au Monstre arrache vn bien si cher, La mienne à son bon-heur sçaura bien l'arracher, Et vainqueur de tous deux en vne seule teste, De ce qui fut mon bien ie feray ma conqueste; La force me rendra ce que ne peut l'amour. Allons-y, chers amie, & dés ce mesme iour...

AMMON.

Seigneur, auparauant d'une ame plus remise Daignez, voir le succez, d'une telle entreprise. Sçauez-vous que Persée est fils de Iuppiter, Et qu'ainsi vous auez, le foudre à redouter?

PHINEE.

Ie sçay que Danaë fut son indigne mere, L'or qui plût dans son sein l'y forma d'adultere; Mais le pur sang des Rois n'est pas moins precieux, Ny moins chery du Ciel, que les crimes des Dieux.

AMMON.

Mais vous ne sçauez pas, Seigneur, que son espée De l'horrible Meduse a la teste coupée, Que sous son bouclier il la porte en tous lieux, Et que c'est fait de vous s'il en frappe vos yeux.

PHINEE.

On dit que ce prodige est pire qu'un tonnerre, Qu'il ne faut que le voir pour n'estre plus que pierre, Et que n'aguere Atlas qui ne s'en put cacher, A cet aspect fatal deuint un grand rocher. Soit une verité, soit un conte, n'importe, Si la valeur ne peut, que le nombre l'emporte: Puisqu' Andromede enfin vouloit me voir perir, Ou triompher d'un Monstre afin de l'acquerir, Que fiere de se voir l'objet de tant d'Oracles Elle veut que pour elle on face des miracles; Cette teste est un Monstre, ausi bien que celuy Dont cet heureux riual la deliure aujourd'huy, Et nous aurons ainsi dans un seul aduersaire Et Monstres à combatre, & miracles à faire. Peut-estre quelques Dieux prendront nostre party, Quoy que de leur Monarque il se dise sorty, Et Iunon pour le moins prendra nostre querelle Contre l'amour furtif d'un espoux infidelle.

Iunon se fait voir dans vn Char superbe, tiré par deux Paons, & si bien enrichy, qu'il paroist bien digne de l'orgueil de la Deesse qui s'y fait porter. Elle se promene au milieu de l'Air, dont nos Poëtes luy attribuent l'Empire, & y fait plusieurs tours, tantost à droite, & tantost à gauche, cependant qu'elle asseure Phinée de sa protection.



SCENE V.

IVNON dans son Char au milieu de sair; PHINEE, AMMON, Suite de Phinée.

IVNON.

N'En doute point, Phinée, & cesse d'endurer.

PHINEE.

Elle-mesme paroist pour nous en asseurer!

IVNON.

Ie ne seray pas seule, ainsi que moy Neptune
S'interesse en ton infortune,
Et desia la noire Alecton
Du fond des Enfers déchaisnée,
A par les ordres de Pluton
De mille cœurs pour toy la fureur mutinée:
Fort de tant de seconds, ose, & sers mon couroux
Contre l'indigne sang de mon volage espoux.

TRAGEDIE. PHINEE.

Nous te suiuons, Deesse, & dessous tes auspices Nous franchirons sans peur les plus noirs précipices. Que craindros nous, amis, nous aus Dieux pour Dieux, Oracle pour Oracle, & la faueur des Cieux D'un contrepoids égal dessus nous balancée N'est pas entierement du costé de Persée.

IVNON.


Ie te le dis encor, ose, & sers mon couroux Contre l'indigne sang de mon perfide espoux.

AMMON.

Sous tes commandemens, nous y courons, Deesse, Le cœur plein d'esperance, & l'ame d'allegresse. Allons, Seigneur, allons assembler vos amis, Courons au grand succez qu'elle vous a promis, Aussi bien le Roy vient, il faut quitter la place, De peur...

PHINEE.

Non, demeurez pour voir ce qui se passe, Et songez à m'en faire vn fidelle rapport, Tandis que ie m'apreste à cet illustre effort.



SCENE VI

CEPHEE, CASSIOPE, ANDROMEDE, PERSEE, AMMON, TIMANTE, CHOEVR de Peuple.

TIMANTE.

Seigneur, le souvenir des plus aspres supplices Quand un tel bien les suit n'a iamais que delices, Si d'un mal sans pareil nous nous vismes surpris, Nous benissons le Ciel d'un tel mal à ce prix, Et voyant quel espoux il donne à la Princesse, La douleur s'en termine en ces chants d'allegresse.

CHOEVR de Musique:

Viuez, viuez, heureux amants, Dans les douceurs que l'amour vous inspire, Viuez heureux, & viuez si long-temps,

TRAGEDIE. 95

Qu'au bout d'un siecle entier on puisse encor vous dire, Viuez, heureux amants.

\$63¢

Que les plaisirs les plus charmants
Facent les iours d'une si belle vie,
Qu'ils soient sans tache, & que tous leurs moments
Facent redire mesme à la voix de l'Enuie,
Viuez, heureux amants.

PESCO

Que les peuples les plus puissants

Dans nos souhaits à pleins vœux nous secondent,

Qu'aux Dieux pour vous ils prodiguent l'encens,

Et des bouts de la Terre à l'enuy nous répondent,

Viuez, heureux amants.

CEPHEE.

Allons, amis, allons dans ce comble de ioye
Rendre graces au Ciel de l'heur qu'il nous enuoye,
Allons dedans le Temple auecque mille vœux
De cet illustre Hymen acheuer les beaux nœuds,
Allons sacrisier à Iuppiter son pere,
Le prier de souffrir ce que nous allons faire,
Et ne s'offencer pas que ce moble lien
Face vn mélange heureux de son sang & du mien.

96 ANDROMEDE CASSIOPE.

Souffrez, qu'auparauant par d'autres sacrifices
Nous nous rendions des eaux les Deitez, propices.
Neptune est irrité, les Nymphes de la mer
Ont de nouueaux sujets encor de s'animer,
Et comme mon orgueil sit naistre leur colere,
Par mes submissions ie dois les satisfaire.
Sur leurs sables témoins de tant de vanitez.
Ie vay sacrifier à leurs Divinitez,
Et conduisant ma sille à ce mesme rivage,
De ses mesmes beautez, leur rendre vn plein hommage,
Ioindre nos vœux au sang des taureaux immolez:
Puis nous vous rejoindrons au Temple où vous allez.

PERSEE.

Souffrez qu'en mesme temps de ma siere marastre Ie tasche d'appaiser la haine opiniastre,
Qu'vn pareil sacrifice, & de semblables vœux
Tirent d'elle l'adueu qui me peut rendre heureux.
Vous sçauez que Iunon à ce lien préside,
Que sans elle l'Hymen marche d'vn pied timide,
Et que sa jalousie ayme à persecuter
Quiconque ainsi que moy sort de son Iuppiter.
CEPHEE.

CEPHEE:

Ie suis rauy de voir qu'au milieu de vos flames

De si dignes respects regnent dessus vos ames:

Allez, s'immoleray pour vous à Iuppiter,

Et ie ne voy plus rien enfin à redouter.

Des Dieux les moins benins l'eternelle puissance

Ne veut de nous qu'amour & que recognoissance;

Et iamais leur couroux ne montre de rigueurs,

Que n'abbate aussi-tost l'abaissement des cœurs.

FIN DV QVATRIESME ACTE.



DECORATION DV CINQVIEME ACTE.

'Architecte ne s'est pas épuisé en la structure de ce Palais Royal qui vient de disparoistre. Le Temple qui luy succede a tant d'auantage sur luy, qu'il fait mépriser ce qu'on admiroit. Aussi est-il iuste que la demeure des Dieux l'emporte sur celle des hommes, & l'Art du sieur Torelli est icy d'autant plus merueilleux, qu'il fait paroistre une grande diuersité en ces deux Decorations, quoy qu'elles soient presque la mesme chose. On voit encor en celle-cy deux rangs de colomnes comme en l'autre, mais d'vn ordre si different, qu'on n'y remarque aucun rapport. Celles-cy sont de porphyre, & tous les accompagnements qui les soustiennent, & qui les finissent, de bronze cizelé, dont la graueure represente quantité de Dieux & de Deesses. La reflexion des lumieres sur ce bronze en fait sortir vn iour tout extraordinaire. Vn grand & superbe Dome couure le milieu de ce Temple magnifique. Il est par tout enrichy du mesme metal, & au deuant de ce Dome l'artifice de l'ouurier jette vne gallerie toute brillante d'or & d'azur. Le dessous de cette Gallerie laisse voir le dedans du Temple par trois portes d'argent ouuragées à iour. On y verroit Cephée sacrifiant à Iuppiter pour le mariage de sa fille, n'estoit que l'attention que les spectateurs presteroient à ce sacrifice les destourneroit de celle qu'ils doiuent à ce qui se passe dans le paruis, que represente le Theatre.



Back of Foldout Not Imaged



ACTE V.

SCENE PREMIERE PHINEE, AMMON. AMMON.



Os amis assemblez brûlent tous de vous

Et Iunon dans son Temple entre vos mains le liure:

Ce riual presque seul au pied de son Autel
Semble attendre à genoux l'honneur du coup mortel.
Là, comme la Déesse agréera la victime,
Plus les lieux seront saints, moindre en sera le crime,
Et son adueu changeant de nom à l'attentat,
Ce sera sacrifice au lieu d'assainat.

Nÿ

100 ANDROMEDE PHINEE.

Que me sert que Iunon, que Neptune propice, Que tous les Dieux ensemble ayment ce sacrifice, Si la seule Deesse à qui ie fay des vœux Ne m'en voit que d'vn œil d'autant plus rigoureux, Et si ce coup sensible au cœur de l'inhumaine D'vn injuste mépris fait vne iuste haine? Amy, quelque sureur qui puisse m'agiter, fe cherche à l'acquerir, & non à l'irriter, Et m'immoler l'objet de sa nouvelle slame Ce n'est pas le chemin de regaigner son ame.

AMMON.

Mais, Seigneur, vous touchez à ce moment fatal Qui pour iamais la donne à cet heureux riual: En cette extremité que pretendez-vous faire?

PHINEE.

Tout horsmis l'irriter, tout horsmis luy déplaire: Soùpirer à ses pieds, pleurer à ses genoux, Trembler deuant sa haine, adorer son couroux.

AMMON.

QuitteZ, quitteZ, Seigneur, vn respect si funeste,

Ostez-vous ce riual, & hazardez le reste: En dûst-elle à iamais dédaigner vos soupirs, La vengeance elle seule à de si doux plaisirs....

PHINEE.

N'en cherchons les douceurs, amy, que les dernières,
Rarement vn amant les peut gouster entières,
Et quand de sa vengeance elles sont tout le fruit,
Ce sont fausses douceurs que l'amertume suit.
La mort de son riual, les pleurs de son ingrate
Ont bien ie ne sçay quoy qui dans l'abord le flatte;
Mais de ce cher objet s'en voyant plus hay,
Plus il s'en est flatté, plus il s'en croit trahy,
Sous d'eternels regrets son ame est abbatuë,
Et sa propre vengeance incessamment le tuë.
Ce n'est pas que ie veüille ensin la negliger,
Si ie ne puis sléchir ie cours à me vanger,
Mais souffre à mon amour, mais souffre à ma foiblesse

Encor un peu d'effort auprés de ma Princesse, Vn amant veritable espere iusqu'au bout, Tant qu'il voit un moment qui peut luy rendre tout. L'inconstante peut-estre encor toute estonnée N'estoit pas bien à soy quand elle s'est donnée,

Et la recognoissance a fait plus que l'amour En faueur d'une main qui luy rendoit le iour. Au sortir du peril paste encore & tremblante, L'image de la mort deuant les yeux errante, Elle a creu tout deuoir à son liberateur: Mais souuent le deuoir ne donne pas le cœur. Il agit rarement sans un peu d'imposture, Et fait peu de presents dont ce cœur ne murmure. Peut-estre, amy, peut-estre apres ce grand effroy Son amour en secret aura parlé pour moy, Les traits mal effacez de tant d'heureux seruices, Les douceurs d'un beau feu qui furent ses delices, D'un regret amoureux touchant son souuenir, Auront en ma faueur surpris quelque soupir, Qui s'échappant d'un cœur qu'elle force à ma perte, Men aura pù laisser la porte encor ouverte. Ah! si ce triste Hymen se pouuoit esloigner.

AMMON.

Quoy, vous voulez encor vous faire dédaigner? Sous ce honteux espoir vostre fureur se dompte?

PHINEE.

Que veux-tu? ne sois point le témoin de ma honte,

Andromede reuient, va trouuer nos amis,
Va préparer leurs bras à ce qu'ils m'ont promis.
Ou mes nouveaux respects sléchiront l'inhumaine,
Ou ses nouveaux mépris animeront ma haine,
Et tu verras mes seux changez en iuste horreur
Armer mes desespoirs & haster ma fureur.

AMMON.

Ie vous plains, mais enfin j'obeïs, & vous laisse.



SCENE II

CASSIOPE, ANDROMEDE, PHINEE, Suite de la Reyne.

PHINEE.

Ne seconde fois, adorable Princesse, Malgré de vos rigueurs l'imperieuse loy....

ANDROMEDE.

Quoy, vous voyez la Reyne, & vous parlez à moy!

PHINEE.

C'est de vous seule aussi que i'ay droit de me plaindre, Je serois trop heureux de la voir vous contraindre, Et n'accuserois plus vostre infidelité Si vous vous excusiez sur son authorité. Au nom de cette amour autrefois si puissante, Aydez un peu la mienne à vous faire innocente, Dites-moy que vostre ame à regret obeit, Qu'vn rigoureux deuoir malgré vous me trahit, Donne Z-moy lieu de dire, elle-mesme elle en pleure, Elle change forcée, & son cœur me demeure, Et soudain de la Reine embrassant les genoux Vous m'y verrez mourir sans me plaindre de vous. Mais que luy puis-ie, helas! demander pour remede Quand la main qui me tuë est celle d'Andromede, Et que son cœur leger ne court au changement Qu'auec la vanité d'y courir justement?

CASSIOPE.

Et quel droit sur ce cœur pouvoit garder Phinée Quand Persée a trouvé la place abandonnée, Et n'a fait autre chose en prenant son party Que s'emparer d'un lieu d'où vous estiez sorty?

Mais

Mais sorty (le diray-ie, & pourrez-vous l'entendre?)

Ouy, sorty laschement, de peur de le desendre. Ainsi nous n'auons fait que le recompenser D'un bien où vostre bras venoit de renoncer, Que vous cediez au Monstre, à luy-mesme, à tout autre:

Si c'est une injustice, examinons la vostre. La voyant exposée aux rigueurs de son Sort, Vous vous estiez desia consolé de sa mort, Et quand par vn Heros le Ciel l'a garantie, Vous ne vous pouuez plus consoler de sa vie.

PHINEE

Ah! Madame...

CASSIOPE.

Et bien, soit, vous auez soupiré Autant que l'a pu faire un cœur desesperé, Iamais aucun tourment n'égala vostre peine; Certes, quélque douleur dont vostre ame fust pleine, Ce desespoir illustre & ces dignes regrets Luy devoient un peu plus que des soupirs secrets. A ce defaut Persée...

PHINEE.

Ah! c'en est trop, Madame, Ce nom rend malgré-moy la fureur à mon ame, Je me force au respect, mais tousiours le vanter C'est me forcer moy-mesme à ne rien respecter. Qu'a-t'il fait apres tout si digne de vous plaire Qu'auec un tel secours tout autre n'eust pû faire, Et tout Heros qu'il est, qu'eust-il osé pour vous, S'il n'eust eu que sa flame & son bras comme nous? Mille & mille auroient fait des actions plus belles Si le Ciel comme à luy leur eust presté des aisles, Et vous les auriez veus encor plus genereux, S'ils eussent veu le Monstre & le peril sous eux. On s'expose aisément quand on n'a rien à craindre. Combatre vn ennemy qui ne pouvoit l'atteindre, Voir sa victoire seure & daigner l'accepter, C'est tout le rare exploit dont il se peut vanter; Et ie ne comprens point, ny quelle en est la gloire, Ny quel grand prix merite une telle victoire.

CASSIOPE.

Et vostre aueuglement sera bien moins compris, Qui d'un sujet d'estime en fait un de mépris.

TRAGEDIE.

107

Le Ciel qui mieux que nous cognoift ce que nous sommes Mesure ses faueurs au merite des hommes, Et d'un pareil secours vous auriez eu l'appuy S'il eust pù voir en vous mesmes vertus qu'en luy. Ce sont graces d'enhaut rares & singulieres, Qui n'en descendent point pour des ames vulgaires, Ou pour en mieux parler, la instice des Cieux Garde ce privilege au digne sang des Dieux, C'est par là que leur Roy vient d'aduoier leur race.

ANDROMEDE

Je diray plus, Phinée, & pour vous faire grace, Ie veux ne rien deuoir à cet heureux secours Dont ce vaillant guerrier a conserué mes iours: Ie veux fermer les yeux sur toute cette gloire, Oublier mon peril, oublier sa victoire, Et quel qu'en soit enfin le merite, ou l'éclat, Ne iuger entre vous que depuis le combat.

Voyez, ce qu'il a fait lors qu'apres ces alarmes Me voyant toute acquise au bon-heur de ses armes, Ayant pour luy les Dieux, ayant pour luy le Roy, Dans sa victoire mesme il s'est vaincu pour moy. Il m'a sacrisié tout ce haut auantage, De toute sa conqueste il m'a fait vn hommage,

Oij

Il m'en a fait vn don, & fort de tant de voix, Au peril de tout perdre il met tout en mon choix, Il veut tenir pour grace vn si iuste salaire, Il reduit son bon-heur à ne me point déplaire, Préferant mes refus, préferant son trépas A l'effet de ses vœux qui ne me plairoit pas.

En vsez-vous de mesme, & vostre violence
Garde-t'elle pour moy la mesme déserence?
Vous auez contre vous & les Dieux, & le Roy,
Et vous voulez encor m'obtenir malgré moy!
Sous ombre d'une soy que vous n'auez pû suiure
Ie dois à vostre amour ce qu'un autre deliure!
A moins que d'estre ingrate à mon liberateur,
A moins que d'adorer un lâche adorateur,
Que d'estre à mes parents, aux Dieux mesmes rebelle,
Vous crierez apres moy sans cesse, à l'infidelle!

C'estoit aux yeux du Monstre, au pied de ce rocher Que l'esset de ma soy se deuoit rechercher.

Mon ame encor pour vous de mesme ardeur pressée Vous eust tendu la main au méprie de Persée,
Et creu plus glorieux qu'on m'eust veuë aujourd'huy Mourir auecque vous, que viure auecque luy:
Mais puisque vous m'auez enuié cette ioye,
Cessez de m'enuier ce que le Ciel m'enuoye,

Et souffrez que ie tasche ensin à meriter Au resus de Phinée vn fils de Iuppiter.

PHINEE.

Ie perds donc temps , Madame , & vostre ame obstinée

N'a plus amour, ny foy, ny pitié pour Phinée?

Vn peu de vanité qui flatte vos parents,

Et d'un riual adroit les respects apparents,

Font plus en un moment auec leurs artifices

Que n'ont fait en six ans ma flame & mes services.

Ie ne vous diray point que de pareils respects

A toute autre que vous pourroient estre suspects,

Que qui peut se priver de la personne aymée

N'a qu'une ardeur civile & fort mal allumée,

Que dans ma violence on doit voir plus d'amour;

C'est un present des Cieux, faites-luy vostre Cour,

Plus sidele qu'à moy, tenez-luy mieux parole.

J'en vay rougir pour vous cependant qu'il me vole:

Mais ce rival peut-estre, apres m'avoir volé,

Ne sera pas tousiours sur ce cheval aissé.

ANDROMEDE.

Il n'en a pas besoin s'il n'a que vous à craindre.

HINEE.

Il peut auec le temps estre le plus à plaindre.

ANDROMEDE

Il porte à son costé dequoy l'en garantir.

PHINEE.

Vous l'attendez icy, ie vay l'en auertir.

CASSIOPE.

Son amour peut sans vous nous rendre cet office.

PHINEE.

Le mien s'efforcera pour ce dernier seruice, Vous pouuez cependant diuertir vos esprits A rendre conte au Roy de vos iustes mépris



SCENE III

CEPHEE, CASSIOPE, ANDROMEDE,

Suite du Roy & de la Reyne.

CEPHEE.

Ve faisoit-là Phinée ? est-il si temeraire Que ce que font les Dieux il pense à le défaire?

CASSIOPE.

Apres auoir prié, soùpiré, menacé, Il vous a veu, Seigneur, & l'orage a passé.

CEPHEE.

Et vous prestiez l'oreille à ses discours friuoles?

CASSIOPE.

Vn amant qui perd tout peut perdre des paroles, Et l'écouter sans trouble & sans rien hazarder, C'est la moindre faueur qu'on luy puisse accorder.

Mais, Seigneur, dites-nous si Iuppiter propice Se declare en faueur de vostre sacrifice, Si de nostre famille il se rend le soustien, S'il consent l'union de nostre sang au sien?

CEPHEE.

Jamais les feux sacrez. Es la mort des victimes N'ont daigné mieux répondre à des vœux legitimes, Tous auspices heureux, Es le grand suppiter Par des signes plus clairs ne pouvoit l'accepter, A moins qu'y joindre encor l'honneur de sa presence, Et de sa propre bouche asseurer l'alliance.

CASSIOPE.

Les Nymphes de la mer nous en ont fait autant.
Toutes ont hors des flots paru presque à l'instant,
Et leurs benins regards enuoyez au riuage
Auecque nostre encens ont receu nostre hommage.
Apres le sacrifice honoré de leurs yeux
Où Neptune a l'enuy messoit ses demy-Dieux,
Toutes ont témoigné d'un panchement de teste
Consentir au bon-heur que le Ciel nous apreste,
Et nos submissions desarmant leurs dédains
Toutes ont pour Adieu battu l'onde des mains.

Que si mesme bon-heur suit les vœux de Persée, Qu'il ait veu de Iunon sa priere exaucée, Nous n'auons plus à craindre aucun sinistre effet.

CEPHEE.

Les Dieux ne laissent point leur ouurage imparfait, N'en doutez, point, Madame, aussi-bien que Neptune Iunon consentira nostre bonne fortune. Mais que nous veut Aglante?



SCENE IV.

CEPHEE, CASSIOPE, ANDROMEDE, AGLANTE,

Suite du Roy & de la Reyne.

AGLANTE.

AH Seigneur, au secours, Du genereux Persée on attaque les iours. Presque au sortir du Temple vne troupe mutine Vient de l'enuironner & desia l'assassine: Phinée en les joignant furieux & jaloux, Leur a crié, main basse, à luy seul, donnez tous.

Ceux qui l'accompagnoient tout ausi-tost se rendent, Clyte & Nylée encor vaillamment le defendent, Mais ce sont vains efforts de peu d'autres suivis, Et ie viens toute en pleurs vous en donner aduis.

CASSIOPE.

Dieux, est-ce-là l'effet de tant d'heureux présages?
Allez, Gardes, allez signaler vos courages,
Allez perdre ce traistre, & punir ce voleur
Qui pretend sous le nombre accabler la valeur.

CEPHEE.

Moderez vos frayeurs, & vous, sechez vos larmes.

Le Ciel n'a point besoin du secours de nos armes,

Il a de ce Heros trop pris les interests

Pour n'auoir pas pour luy des miracles tous prests,

Et peut-estre bien-tost sur ce lasche aduersaire

Vous entendrez tomber le foudre de son pere.

Iugez de l'aduenir par ce qui s'est passé,

Les Dieux acheueront ce qu'ils ont commencé,

Oüy, les Dieux à leur sang doinent ce privilege,

Y mester nostre main c'est faire vn sacrilege.

CASSIOPE.

Seigneur, sur cet espoir hazarder ce Heros, C'est trop...



SCENEV

CEPHEE, CASSIOPE, ANDROMEDE, PHORBAS, AGLANTE, Suite du Roy & de la Reyne.

PHORBAS.

MEttez, grand Roy, vostre esprit en repos, La teste de Meduse a puny tous ces traistres.

CEPHEE.

Le Ciel n'est point menteur, & les Dieux sot nos maistres.

PHORBAS.

Außi-tost que Persée a pu voir son riual, Descendons, a-t'il dit, en vn combat égal, Quoy que i'aye en ma main vn entier auantage, Le ne veux que mon bras, ne pren que ton courage.

116 ANDROMEDE

Prens, prens cet auantage, & j'vseray du mien, Dit Phinée, & soudain sans plus répondre rien, Les siens donnent en foule, & leur troupe pressée Fait choir Menale & Clyte aux pieds du grand Persée. Il s'écrie ausi-tost, amis, fermez les yeux, Et sauuez vos regards de ce present des Cieux, l'atteste qu'on m'y force & n'en fais plus d'excuse.' Il découure à ces mots la teste de Meduse. Soudain j'entends des cris qu'on ne peut acheuer, I'entens gemir les vns, les autres se sauuer, I'entens le repentir succeder à l'audace, l'entens Phinée enfin qui luy demande grace. Perfide, il n'est plus temps, luy dit Persée. Il fuit; l'entens comme à grands pas ce vainqueur le poursuit, Comme il court se vanger de qui l'osoit surprendre, Ie l'entens s'éloigner, puis ie cesse d'entendre. Alors ouurant les yeux par son ordre fermez, Ie voy tous ces méchans en pierre transformez, Mais l'un plein de fureur, & l'autre plein de crainte En portent sur le front l'image encor empreinte, Et tel vouloit frapper, dont le coup suspendu Demeure en sa statuë à demy descendu, Tant cet affreux prodige....



SCENE VI

CEPHEE, CASSIOPE, ANDROMEDE, PERSEE, PHORBAS, AGLANTE,

Suite du Roy & de la Reyne.

CEPHEE à Persée.

Est-il puny, ce lasche,

Cet impie?

PERSEE.

Oüy, Seigneur, & si sa mort vous fasche, Si c'est de vostre sang auoir fait peu d'estat....

CEPHEE.

Il n'est plus de ma race apres son attentat, Ce crime l'en dégrade, & ce coup temeraire Essace de mon sang l'illustre caractere.

118 ANDROMEDE

PERSEE.

Puissant maistre du foudre, est-il quelque tempeste Que le Destin jaloux à disiper m'apreste?
Quelle nouvelle espreuve attaque ma vertu?
Apres ce qu'elle a fait la desaduoüerois-tu?
Ou si c'est que le prix dont tu la vois suivie
Au bon-heur de ton fils te fait porter envie?



SCENE VII

MERCVRE, CEPHEE, CASSIOPE, ANDROMEDE, PERSEE, PHORBAS,

AGLANTE, Suite du Roy & de la Reyne.

MERCVRE au milieu de l'air.

R Oy, Reyne, & vous Princesse, & vous heureux Que Iuppiter mon pere (vainqueur, Tient pour mon digne frere,

Ne craignez plus du Sort la jalouse rigueur:

Ces portes du Temple fermées, Dont vos ames sont alarmées,

Vous marquent des faueurs où tout le Ciel consent;

Tous les Dieux sont d'accord de ce bon-heur supréme,

Et leur Monarque tout-puissant Vous le vient apprendre luy-mesme.

Mercure reuole en haut apres auoir parlé.

CASSIOPE.

Redoublons donc nos væux, redoublons nos ferueurs, Pour meriter du Ciel ces nouuelles faueurs.

CHOEVR de Musique.

Maistre des Dieux, haste-toy de paroistre, Et de verser sur ton sang & nos Roys Les graces que garde ton choix A ceux que tu faie naistre.

Fay choir sur eux de nouuelles couronnes, Et fay-nous voir par vn heur accomply, Qu'ils ont tous dignement remply Le rang que tu leur donnes.

Tandis qu'on chante, Iuppiter descend du Ciel dans vn Trosne tout éclatant d'or & de lumieres, ensermé dans vn nuage qui l'enuironne. A ses deux costez deux autres nuages apportent iusqu'à terre Iunon & Neptune appaisez par les sacrisices de nos amants, & se déployant en demy-rond autour de celuy de Iuppiter, sont le plus agreable spectacle de toute cette representation, & occupent toute la face du Theatre. Iuppiter demeure au milieu de l'air, d'où il parle à ces Princes.

SCENE



SCENE VIII

IVPPITER, IVNON, NEPTVNE, CEPHEE, CASSIOPE, ANDROMEDE, PERSEE, PHORBAS, AGLANTE,

Suite du Roy & de la Reyne.

IVPPITER dans son Trône au milieu de l'air.

DEs nopces de mon fils la terre n'est pas digne, La gloire en appartient aux Cieux, Et c'est là ce bon-heur insigne Qu'en vous sermat mon Temple ont annoncé les Dieux.

Roy, Reyne, & vous, amants, venez, sans jalousie Viure à iamais en ce brillant sejour,

Où le Nectar & l'Ambrosie

Vous seront comme à nous prodiguez chaque iour:

Et quandla nuit aura tendu ses voiles,

Vos corps semez de nouvelles estoiles

Du haut du Ciel éclairant aux mortels,

Leur apprendront qu'il vous faut des Autels.

2

IVNON à Persée.

Iunon mesme y consent, & vostre sacrifice A calmé les fureurs de son esprit jaloux.

NEPTVNE à Cassiope.

Neptune n'est pas moins propice, Et vos encens desarment son couroux.

IVNON.

Venez, Heros, & vous Cephée, Prendre la haut vos places de ma main.

NEPTVNE.

Reynes, venez, que ma haine estouffée Vous conduise elle-mesme à cet heur souuerain.

PERSEE.

AccableZ & confus d'une faueur si grande....

IVNON.

Arrestez, là vostre remerciment, L'obeissance est le seul compliment Qu'agrée vn Dieu quand il commande. Si-tost que Iunon a dit ces vers, elle fait prendre place au Roy & à Persée auprés d'elle, Neptune fait le mesme honneur à la Reyne & à la Princesse Andromede, & tous ensemble remontent dans le Ciel qui les attend, cependant que le peuple pour acclamation publique chante ces vers qui viennent d'estre prononcez par Iuppiter.

Allez, amants, allez sans jalousie
Viure à iamais en ce brillant sejour,
Où le Nectar & l'Ambrosie
Vous seront comme aux Dieux prodigueZ chaque iour:
Et quand la nuit aura tendu ses voiles,
Vos corps semez de nouuelles estoiles
Du haut du Ciel éclairant aux mortels,
Leur apprendront qu'il vous faut des Autels.*

FIN.

PRIVILEGE DV ROT.


OVIS PAR LA GRACE DE DIEV ROY DE FRANCE ET DE NAVARRE: A nos amez & feaux Confeillers les Gene tenans nos Cours de Parlement, Maistres des Requestes ordinaires de nostre Hostel, Bailliss, Seneschaux, Prenosts, leurs Lieutenans, & à tous autres nos Institutes & Officiers qu'il appartiendra, Salut. Nostre cher & bien amé LE SIEVR CORNELLE, Aduocat en nostre Cour de Parlement de Normandie, Nous a fait remonstrer,


qu'il a cy-deuant donné au Public diuerses pieces de Theatre qui ont esté receuës auec fuccez, & qu'il est sollicité d'en mettre maintenant au jour quatre nouvelles intitulées, Andromede, Nicomede, le feint Aftrologue, & les Engagemens du hazard; ce qu'il ne pour faire sans avoir nos Lettres de permission sur ce necessaires. A CES CAVSES, & de-Arans gratifier & fauorablement traitter ledit SIEVR CORNEILLB, en confideration de ses seruices, Nous luy auons permis & permettons par ces presentes de faire imprimer, vendre & debiter en tous les lieux de nostre obeyssance, lesdites Quarre pieces. de Theatre intitulees Andromede, Nicsmede, le feint Astrologue, & les Engagemens du haz ard, par tel Imprimeur ou Libraire qu'il voudra choisir, conjointement ou separément, en vn ou plusieurs volumes, en telles marges, en tels caracteres, & autant de fois que bon luy semblera durant dix ans, à compter du jour que chaque piece ou volume sera acheue d'imprimer pour la premiere fois. Et faisons tres-expresses desenses à toutes personnes de quelque qualité & condition qu'elles soient, d'imprimer, faire imprimer, vendre & debiter lesdites pieces de Theatre en aucun lieu de nostre obeyssance sans le consentement de l'exposant, ou de ceux qui auront droit de luy, à peine de deux mil liures d'amende payables sans deport par chacun des contreuenans, & applicables vn tiers à Nous, vn tiers à l'Hostel-Dieu de Paris, & l'autre tiers audit Exposant, ou au Libraire dont il se sera seruy, de confiscation des Exemplaires contresaits, & de tous despens. dommages & interests. A condition qu'il sera mis deux Exemplaires de chaque volume, qui sera imprimé en vertu des presentes, en nostre Bibliotheque publique, & vn en celle de nostre tres cher & feal le Sieur Marquis de Chasteauneuf Cheualier, Garde-des-Seaux de France; à peine de nullité des presentes. Du contenu desquelles, Nous voulons, & vous mandons que vous faciez joisyr plainement & paisiblement durant ledit temps l'exposant, & ceux qui auront droit de lay, sans souffrir qu'ils y regoiuent aucun empeschement. Voulons aussi qu'en metrant au commencement ou à la fin de chacune desdites Pieces ou Volumes, vn Extraid des presentes, elles soient tenuës pour deuëment signifiées, & que foy y soit adjousée, & aux copies collationnées par vn de nos amez & feaux Conseillers & Secretaires comme à l'original. Mandons au premier nostre Huissier ou Sergent sur ce requis de faire pour l'execution des presentes tous Exploits necessaires, sans demander autre permission. CAR TEL EST NOSTRE PLAISIR, nonobstant clameur de Haro, Chartre Normande, & autres lettres à ce contraîres. Donné à Paris le 12. iour de Mars l'an de grace 1651. & de nostre regne le huisliesme.

PARLE ROY EN SON CONSEIL.

CONRART.

Achené d'imprimer à Rouen par Laurens Maurry le 13. d'Aoust 1651.





SPECIAL 86-B PQ 27429 1747 A1 1651

GETTY CENTER LIBRARY

